

## **ASO LUA, 28 SETEMA 2021**

*Na toe faaauau Taulumaga a le Fono Aoaofaitulafono i le itula e 5:58 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Faiga Palota (Nu 2) 2021.*

**FOFOGA FETALAI:** Ou te faasilasila atu ua toe amatalia Taulumaga o le Fono Aoaofaitulafono.

Lafo a le Komisi faa-Palemene. Ou te tapa lau afioga i le Sui Fofoga Fetalai, mo le lafo a le Komisi faa-Palemene. Tulai mai lau Afioaga.

### **LAFO A LE KOMISI FAA-PALEMENE**

**Afioga AUUAPAAU MULIPOLA ALOITAFUA MULIPOLA (Sui Fofoga Fetalai):** Lau Afioaga i le Fofoga Fetalai, e tusa ai ma le Tulafono Tumau 170(2) faafuaiupu (g) ma le (a), ou te faatu le lafo, *Ina ia faamaonia e le Fono Aoaofaitulafono ia sui usufono mo Komiti Faa-Palemene ua taua i lalo ma le Polokalame o Fonotaga faale-tausaga mo le tausaga faale-kalena o lo o faagasolo nei, e pei ona fautuaina e le Komisi Faa-Palemene.*

#### **1. Komiti o Tulafono Tumau Mataupu Tau Faiga Palota, Talosaga ma Tofiga faale-Faavae.**

1. *Afioga AUUAPAAU Mulipola Aloitafula Mulipola.*
2. *Afioga VAELE Paiaaau Iona Paiaaau Sekuini.*
3. *Afioga TEA Tooala Peato.*
4. *Tofa MANULELEUA Paletasala T Tovale.*
5. *Tofa Hon LAUOFO Fonotoe Nuafesili Pierre Lauofo.*
6. *Tofa ALE Vena Ale.*
7. *Afioga Hon LOAU Solamalemalo Keneti Sio.*

#### **2. Komiti o Tupe Maua ma Tupe Totogi.**

1. *Afioga TOEOLESULUSULU Cedric Pose Salesa Schuster.*
2. *Afioga MAGELE Sekati Fiaui.*
3. *Afioga VAELE Paiaaau Iona Paiaaau Sekuini.*

4. *Afioga MASINALUPE Makesi Masinalupe.*
5. *Susuga Hon TUILAIPA Fatialofa Auelua Sailele Malielegaoi.*
6. *Afioga Hon TAPUNUU Niko Lee Hang.*
7. *Tofa LEALAIPEPULE Rimoni Aiafi.*

**3. *Komiti o le Vaega tau le Vafealoaloai***

1. *Afioga FEPULEAI Faasavalu Faimata Sua.*
2. *Afioga AGASEATA Valelio Tanuvasa Peto.*
3. *Tofa FESOLAI Apulu Tusiupu Tuigamala.*
4. *Tofa SEUAMULI Fasi Toma.*
5. *Tofa MAUU Siaosi Puepuemai.*
6. *Tofa LENATAI Victor Faafoi Tamapua.*
7. *Tofa Hon FAIMALOTOA Kika Stowers-Ah Kau.*

**4. *Komiti o le Vaega Tau le Tamaoiga***

1. *Afioga VAELE Paiaaaua Iona Paiaaaua Sekuini.*
2. *Tofa LAGAAIA Tiatuau Tufuga.*
3. *Afioga NIUAVA Eti L Malolo.*
4. *Afioga MASINALUPE Makesi Masinalupe.*
5. *Afioga FUAAVA Suluimalo Amataga.*
6. *Afioga Hon LAUTAFI Fio Selafo Purcell.*
7. *Afioga ALAIASA Moefaaouo Malaitutogiai Sepulona Moananu.*

**5. *Komiti o Vaega o Atinae Eseese***

1. *Afioga NIUAVA Eti L.Malolo.*
2. *Afioga TOEOLESULUSULU Cedric Pose Salesa Schuster.*
3. *Tofa FESOLAI Apulu Tusiupu Tuigamala.*
4. *Afioga MAGELE Sekati Fiaui.*
5. *Afioga SULAMANAIA Fetaiai Tauiliili Tuivasa.*
6. *Afioga LEAANA Ronnie Posini.*
7. *Afioga LUPEMATASILA Galumalemana Tologata Togia Tile Leia.*

*Polokalame o Fonotaga Faale-Tausaga mo le tausaga Faale-Kalena, o lo o faagasolo nei.*

<i>ASO</i>	<i>MASINA</i>	<i>TAUSAGA</i>
<i>14</i>	<i>Tesema</i>	<i>2021</i>
<i>18</i>	<i>Ianuari</i>	<i>2022</i>

O le lafo lea ma le faaaloalo lau Afioga.

*Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina*

*Na faamaonia le lafo.*

**FOFOGA FETALAI:** E faataatiaese Taulumaga a le Fono Aoao Faitulafono i le aoauli analeila o lo o saunoa le sui usufono mo Salega Nu 1.

O le taimi lenei ou te tapa lau afioga i le sui mamalu e faaauau lau saunoaga toe 3 ou minute.

**Afioga FEPULEAI FAASAVALU FAIMATA SUA:** E momoli le agaga faafetai i laua afioga i le Fofoga Fetalai, afioga i le Palemia ma le mamalu o le Kapeneta, tainane o le Taitai o le Itu Agai sui Taitai ma le mamalu o sui usufono o le Palemene ae a Afioga i Ofisa Sili o Pulega o Matagaluega ma Faalapotopotoga i lenei vaega o le aso.

E faafetai mo lou avanoa ua toe faaauau ai se lagona o lenei itumalo ma lana usugafono aua se manatu faaopoopo i le Tulafono o lo o taufaaofi nei e ala i le Tulafono o Faiga Palota.

E taofia le tautalaga, a o gata se tautalaga i le vaega o le faamalamalamaina po o se manatu faailo i le monotaga faale-lotu. Peitai o lou talitonuga pe a ou vaa i le fuaiupu 3 (d), o lo o faapea ona faamalamalama mai ai le malosiaga o le isi tagata e toatolu i ai tagata e mafai ona sainia le pepa a se sui tauva. I lau la lea vaai i le pepa lea, o lo o aumai ai ma faamautinoa, i le laina 5,6,7, ma le 8. O lo o faailoa auiliili mai ai i lea vaega. E le o le faamuamua o le monotaga faale-lotu, ae o lo o faailoa mai ai i i, pe afai ae musu se matai po o le sui tamaitai po o le pulenuu e saini le pepa a le sui tauva. Ona agavaa loa lea o le tagata lona 3 lea na te sainia le pepa, e auala mai i le monotaga faale-lotu.

I lou talitonuga faa-sui usufono, e taua ia te au le monotaga faale-lotu, aua e leai se sui tauva po o se sui faipule e le tatau ona faia sana monotaga faale-lotu. So o se taimi lava e faaee ai le faafotualii po o le faafotuolevaaulu, e tatau lava ona fai sana monotaga faale-lotu.

Aua a leai sana monotaga faale-lotu i lou talitonuga, pe i ua le agai lea sui i se tulaga e tautua ai i le Atua ma lona finagalo.

Silasila lau afioga i le Fofoga Fetalai, o le tele o faafitauli lea e tutupu i lo tatou atunuu, e matua lava le tuu i le aufaigaluega tofofi a le Atua. O lea foi na tatou matauina i feeseeseaiga i talitonuga ma manatu ma lagona i lea vaitaimi ua tea atu. Sa tele lava ina faaoga le malosi lea o le Talalelei e ala i le aufaigaluega, e tau fofu ai le va lea. A fai la tatou te le amanaia le monotaga faale-lotu, o lona uiga, ua foliga mai si tulaga lea, seiloga e oo i ni mea tetele tatou te manaomia ai le Atua ma Lana Talalelei, ona aumai lea i luma. Ae a oo loa i mea faapea o le usugafono ma le sauni o le sui e tauva i upufai o Malo. Ona foliga lea ua le amanaia le tautua i le Atua ma Lana Talalelei.

I lou talitonuga faausufono, ou te lagolagoina le monotaga faale-lotu. E pau lava lea o le vaivaiga, ona e pei ua lilifa saunoaga faapea e ave le faamuamua i le monotaga faale-lotu, ae o lo o i ai lava le auala e tatau ona fai.

E muamua lava lau monotaga faale-nuu, aua e leai se matai Samoa e le faia sana monotaga faale-nuu, seivagana o au lea o le a tauva ma se tasi uso. Ona ou taumafai lea e faalafi le pulenuu po o le sui tamaitai, pe togitupe po o se isi lava auala, ona agavaa loa lea o le isi sui e alu e aumai lana monotaga faale-lotu, ina ia mafai ai ona tauva. Mo tagata lautele ina ia tutusa avanoa e tauva ai sui.

E pei o sou lena lagona i le Tulafono, e lagolagoina e lenei itumalo, e tatau ona fai sau tautua i le Atua e ala i sau monotaga faale-lotu.

Ona faasolo mai lea i lalo lau afioga i le Fofoga Fetalai. O le teuteuina o le Fuaiupu 54 o le Tulafono autu, lea i le fuaiupu 5, o lea e agai ai i le tasi le palota lea faapea o le pre-polling. Na ou vaai ma le faanoanoa, aua ou te sau mai Salafai. I le aso lea na gasolo ai matou Salafai i le faiga palota. E ova ma le 300 tagata o lou itumalo na o, tele le tupe na alu. E faaee i luga o tagata ia le malosiaga o le tupe e tatau ona o ai. O le pasi o le vaa o le pasi. Peitai a na lava le tasi o le aso e pei ona o lea e tuu atu i le Tulafono lea, ou te lagolagoina. Ae ave ifo isi tupe ia ua faaalu i isi aso, sei tau totogi ai le Matagaluega a Leoleo ma le Faiga Palota e ao ma le po, po ma le ao, tapena lenei faiga palota.

Silasila lau Afioga i le Fofoga Fetalai, le aso o le faitauga palota, e ao lelei le Aso Faraile ma le Aso Toonai alu ma le Aso Sa, o faaaaogagase le faiga palota ma le Matagaluega o Leoleo.

I lou talitonuga, ou te lagolagoina le tasi o le aso, ae sei fai faalelei ia alauni ma totogi o nai tagata ia. O tatou ia, na ona uma lava tatou o tatou momoe ma tofafa, a o lenei lava e feagai nai nei alo ma fanau a le atunuu ia ma le faatinoga o le auaunaga.

Ona oo mai lea i le isi vaega lea. Lau Afioga i le Fofoga Fetalai o le tulaga i palota faapitoa. E i ai le talitonuga e tatau ona toe faatu fale palota faapitoa ia, i Upolu nei aua matou i Salafai. E fai si tele o le avega a matou i Salafai, i le agai i Savaii ma le toe foi mai. O le ala lea o le o atu i o, ua lilifa ia tagata ua faasolo ina le fialia talu ai lenei suiga sa i ai. Ae o le tulaga foi lea i le faapea mai, ne i fesopoai ia suafa matai i le palota mai i le isi itumalo ona o le monotaga faale-lotu.

O le faafitauli lea na tupu, o lea ou te mafaufau i le ituaiga tulaga o le itumalo faapalota. O lea ua fesopoai ai laina ia, aua a na tatou o i itumalo faaalalafaga, e i ai lou talitonuga e le fesopoai. Ae ona ua fesopoai tulaga ia ona o itumalo faapalota. Pei o le mea lea o lea o le a tupu, faaoga ai le tulaga lea. Ona maua lea o le tulaga lea e popole ai le isi tasi o sui, o le sau o le matai Savaii, alu atu i Faleata tulou le itumalo. Pe sau foi le matai Upolu ae alu i lou itumalo a o la e fai lana monotaga. Ia e pei o le tulaga lea, e faailoa atu ai i lau afioga, o le lagolagoina e lenei itumalo, le teuteuga o le Tulafono o le Faiga Palota, e tusa ai ma lenei afiafi.

E momoli atu le faafetai tele i lau afioga i le Fofoga Fetalai, ma le afioga i le Minisita e ona ina le Tulafono, faafetai mo le tapenaga. Faafetai tele.

**FOFOGA FETALAI:** Faafetai saunoa, o lea ua manino foi le fautuaga e pei ona laga mai e le sui mamalu. Ou te iloa o lea ua ...matau atu o lea ua tulai mai le sui mamalu Aleipata Itupa i Luga.

**Afioga FUAAVA SULUIMALO AMATAGA (Aleipata Itupa i Luga):** Ua faafetai i lau afioga i le Fofoga Fetalai mo le avanoa e fai ai foi se sao o lenei itumalo e tusa ai ma le Tulafono ua i lumamea i lenei itula.

Ae muamua ona avatu pea le viiga i lo tatou Tapaau i le Lagi, e pei ona avea ai foi lau afioga i le Fofoga Fetalai, ma o tatou ositaulaga i le itula ua sola. Ia saga viia ai pea lona agalelei ina ua mafai ona faataunuaina ma le manuia ia fuafuaga mo lo tatou valaauina.

O le a le toe oo se faamatalaga i tulaga o paia ma mamalu o le atunuu. O lea foi ua uma ona sausaunoa nisi o sui usufono ma faapea foi ona paepae faatupe taulafoga ia paia ma mamalu o Samoa, aua o Samoa lava ia o le ao e leleumalama.

Ae o le a taumafai atu loa, se manatu vaivai o lenei usugafono e tusa ai foi ma le Tulafono lea ua opea i luma o le Maota. O le agaga o le Tulafono e iai le talitonga o lenei usufono, o le taumafai e faaleleia nisi o tulaga po o aulape o Tulafono sa i ai i le faatinoga o faiga palota. Ma e tau agai la se matau i le faitau atu i suiga o lea ua taatia nei i le Tulafono i le tulaga ina ia ogatasi. Ma le tulaga lea, o a mea o lo o faataua, o a foi mea o lo o afifi i le tapenaga o le Tulafono i le tulaga o le Faavae aemaise foi o Tulafono a Samoa. E mafai ona ou vaai i luga o upega tafailagi, o lo o i ai nisi o faasalalauga i le taimi o tapena le faiga palota. O lo o i ai le tulaga o le tatou Faavae, e tataua ona tatou faataua la tatou aganuu aemaise o le faakerisiano. E pei o mea taua ia o lea e afifi i le tapenaga uma o Tulafono aemaise foi le Faavae o Samoa.

O le tulaga lea e i ai, o le matafaioi lea tauave faatasi a tatou. E le o agai la faapea na o tatou o faipule, vaeane le paia o le Maota nei. E i ai le talitonuga o le matafaioi lea a so o se tagata Samoa. E i ai foi se vaivaiga, a e lei afifio mai pe oo mai foi se sui mai itumalo e avea ma sui faipule o lona itumalo, e tataua lava ona oo mai ua i ai sana tapenaga, tapenaga la lea mai tua o afioaga, o aiga, itumalo aemaise foi o le Ekalesia.

E i ai le talitonuga i le aganuu lava ia, o sou lava ia manatu vaivai i ai, i le aganuu lea i lou lea iloa. E matai loa le tagata o lona uiga ua tataua ona amata ona fai monotaga i le nuu, aemaise foi i tulaga faale-ekalesia o matafale. O sou lena iloa i le tulaga lea. Ua amata ai loa ona tausii nuu ia le matai lea. Ma o le tausiga la lea i totonu o pulega a alii ma faipule, e pei e aoga ai le matai i tulaga o le tausiga o le nuu, i le tulaga o le tapenga o tulafono, aemaise o mea fai a le nuu ina ia maua se fealofaniga, ia ffilemu le nuu ma ia faapena ona i ai le tulaga o le maopoopoga. A i ai le maopoopoga lea ia o lona uiga e tataua ona i ai le monotaga toe fai ma le matafale faale-lotu. Ma o le tulaga lena o lea e i ai, a atoa mea ia i se matai o le a tapena e sau e faipule, ia aua o lea e amata mai i, aua o upu lava ia o le tusi, “a fia taitai, auauana. A fia

muamua ia mulimuli.” A lea foi o upu a si o tatou atunuu, o le ala lava i le pule o le tautua. Ma o le atoatoaga la o le agaga o se faamatalaga. Aua o lea e vaai atu i le Tulafono e pei e foliga mai, it’s either o le monotaga po o le matafale e ono qualify ai pe agavaa ai le sui i le faiga palota.

Ae pei o le manatu o lenei usugafono, o le i ai uma o le 2, ia matafale toe monotaga i le tulaga lea e sau o la e i ai le maopoopoga. Aua a sau foi se sui i se itumalo ma se nuu o la e tautua uma i mea ia, mea ia o lo o afifi i totonu o le Faavae o Samoa. O lau aganuu, aemaise o lau faakerisiano. Aua o lea ua i totonu i lo tatou fFaavae, o le Atua, Tasi Tolu Paia, e faavae i ai Samoa.

Ae pei o tulaga ia o lo o taumafai atu i ai ina ia tapena mai le matai, o la ua uma ona i ai le tulaga foi lele, ia aua ne i i ai le tulaga tau faaoleole, olegia le nuu, olegia le aulotu, ma tulaga faapena. Aua o la ua iloa a fai e ia i totonu o le osiosiga nuu, o lona uiga e i ai faasalaga ma tulaga uma faapena. Ma ia silafia lelei foi e le matai o lo tapena e fia alu e faipule, ia tulaga i le va nonofo ai, le fetausiai i totonu o le itumalo.

Ua i ai vaega foi lea malamalama i totonu lava ia o le saofaiga a le nuu. Ae a i ai tulaga fetausiai ma le isi nuu o le itumalo, ona tau i ai lea o nai vaega nenefu. A o le tulaga taua lea e tapenapena mai ai sui. A o le agaga la o le taumafai atu, e taua le i ai o le monotaga faale-nuu ma le matafale faale-lotu.

Tatou agai mai i le vaega o le Tulafono, i le fuaiupu 3. E i ai le tulaga o le (a) le faafuaiupu (1) (d) i le tulaga o le aloaia o le monotaga a le sui pe afai na fai i totonu o le vaitaimi o tausaga sosoo e 3 a o lumanai ai le aso e faatoai ai.

E toe avatu pea se manatu i le tulaga o le 3 tausaga sosoo. E le o i ai se tulaga foi lea e maioio ai po o ...aua a fai ua 30 ai lava nisi o matai ua 40 talu ona suafa, ia a faapea o le tulaga lea e fai atu ai, pe i ai se tapulaa po o ni limitations, po o le 10 i le 20 tausaga, e faaoga mai e qualify ai lana monotaga sa fai i totonu o le nuu, ma tulaga uma faapena. E pei o le tulaga lena o lea e avatu ai se manatu vaivai, aemaise foi le fuaiupu © i le fuaiupu 5, lea e aafia ai le tulaga o le gaoioiga faale-lotu.

Ona e i ai le talitonuga o le matafale, e tau i ai se eseesega laititi i lau matau mai monotaga. Aua o le monotaga o lau tautua i le nuu, i le tulaga uma i le faiga o le nuu, fausia o tulafono, faamamalu ia ma tausi le filemu i totonu o le nuu. A o matafale, e agai lea i gaoioiga ma matafaioi faale-lotu, e pei o se vaega o se auaunaga po o se tautua e tuusaoloto e fai i le loto malie o le sui latou ia.

O le isi mea o le matafale, o totonu foi o le matou nuu, e mafai ona fai le matafale a le taulealea pe afai e leai se matai o le aiga, po o se matafale foi o se tina o se aiga, e ui lava e le matai, ae o lo o mafai ona fai tulaga ia. E pei o si eseesega laititi ia, ona e i ai la le agaga o lenei usugafono, alu faatasi monotaga ma le matafale ona e i ai eseesega laititi ia.

O le (d) i le faafuaiupu (1) (d), lea e auai Ekalesia i totonu, o le tulaga e fai lau monotaga ae e te fai matafale i le isi nuu. Aua o lea e sau ai le vaega lea e faapea. Auai i Ekalesia i totonu o le nuu o le itumalo ua faamoemoe le sui e tauva mai ai. O lona uiga e pei o le faataitaiga lea na avatu e le Afioga ia Lautafi, i le mea lea o la e fai le monotaga i totonu o le nuu, ae o lo o lotu ma tausii ekalesia i le isi itumalo. E pei o vaega ia, e pei e faafesiligia e lou sui pe ono qualify la le sui lea po o le matai lea i le tulaga lea, ona o la e foliga mai o la e fai le matafale, ae le o totonu o le nuu po o le itumalo. O la e tautua ai i nisi...o le tele foi o mea lea ua i ai lenei vaitaimi, ua toatele foi le mamalu o le atunuu o lo o lolotu tausavali, e agai atu lava pasi ma ao mai, ma agai i le vaega foi o le atunuu, o lo o faapea ona tapuai ai ma fai ai a latou sauniga. Ae pei o se faafesili lea e taatia atu i lau afioga i le Minisita, ia taumafai e maioio i totonu o le Tulafono. Po o le teuteuga lea i le fuaiupu 54 o le Tulafono. Lea e i ai le vaega o le fale faipalota faapitoa. Ma e auai lenei usugafono i le tulaga lea, aua manatua foi, atonu o sui mai Savaii lea e tele ina lagolagoina le tulaga lea. A o matou foi i Aleipata, ia o o le taumua o lo o oso mai ai le la, afai o se isi e maupaolo i Falealupo ae palota i Aleipata, ia o le tulaga lena i le feoaiga e fai si mamao ma tulaga uma faapea. O tulaga la na, o lea e oso mai le la i tua i Sasae i Aleipata, ae toe goto atu i Falealupo i mea o lo o i ai nisi o lo o palota i ai i tua. E fai lava si mamao tele aua le feoaiga i tulaga o palota.

O le fuaiupu 6, lea e teuteu ai le fuaiupu 58, ua lagolagoina foi le tulaga o le lolomiina o pepa palota i se tulaga e tataua ona tapunia, e tataua ona lolomi ina ua tapunia ia sui ia ua faau i tua o latou suafa. Ia ma isi uma vaega ia 7, i le tulaga o le aso e fai ai le palota muamua. E auai ai foi lenei usugafono i le tulaga lena, atonu o le a sefe ai foi nisi o seleni aemaise ai foi o le tele o le galuega a le Matagaluega, o faiga palota o lo o faagasolo ai ia tulaga.

Aemaise foi la o le faitau aloa ai le fuaiupu e 9 lea e teuteu ai le fuaiupu 83 o le tulafono autu, i le taimi o le faitauga aloaia, ona ua i ai foi mea e tutupu mai, ina ua fai le palota muamua, ma faitau ai e pei ona i ai nisi o saunoaga. A fai lava e toatasi le tagata na palota i le aso lena, ua iloa lelei lava le tagata ina ua uma faitau mai, e na o le tasi lava le sui. Ae manaia le tuufaatasi se i fai le faitauga aloaia mulimuli ane i le taimi e maea ai le palota aoao.

E pei o nai vaega ia, e tele lava nisi o mataupu o lea ua uma ona avatu i ai finagalo ma saunoaga a le mamalu o le Maota. Ae o nai mea ia ua toe autilotilo i ai lou sui, e tapenapena atu ai si au pitolaau e faamausali ai se taumafaiga ia le teuteuga o le Tulafono lea ua i luma nei i lumamea.

Ia alofagia e le Atua toega o lenei aso, lau Afioga i le fofoga fetalai. Soifua ma ia manuia.

**FOFOGA FETALAI:** Faamalo le saunoa. Tulai mai le sui o Falelatai ma Samatau. E na o se fesoasoani lava a le Nofoa, ina ia tatou saunoa pea i itu aoga ma le faavae o le Tulafono Tau Faaofi, aua e i ai

lava le taimi o auiliiliga, o nai avanoa na, e fesoasoani atu foi i tatou sui e le i saunoa e faafaigofie ai le tatou galuega.

**Afioga LUPEMATASILA GALUMALEMANA TOLOGATA TOGIA TILE LEIA:** Faafetai i lau afioga i le Fofoga Fetalai mo le avanoa. E manatu ua maua se fasiligamalosi o lau afioga i se malologa sa feagai ai. Ae i ai foi le manatu tatou tiu i le latasi o lou sa folau i le taimi ua sola i le viiga ma le faafetai i le Atua. Ia tau ia ina ia logo malie i le faafofoga a lo tatou Tapaau i le lagi le taulaga ua siitia.

Ae ua ou tulai atu i le ava ma le faaaloalo e faaali foi se sao o lenei itumalo i le Tulafono Tau Faaofi ua folasia i luma o le Maota.

E muamua ona momoli atu le agaga faafetai i lau afioga i le Minisita faapea foi le Ofisa Sili o Pulega ma le Matagaluega i le tapenaina o lenei tulafono toe teuteu. A o se vaai a lenei itumalo, e tasi lenei Tulafono e matua anoanoai suiga mai lea taimi i lea taimi. Ma e i ai foi le manatu maualuga, so o se Tulafono lava e fai, ia po o ni teuteuga foi e fai, e le mafai ona tatou faamalieina tagata uma. A o le mea taua e tatau ona silasila totoa i ai, ia toatele se vaega o le atunuu e faamalieina ai. Aua ne i faamanuiaina ai na o se vaega toaitiiti. I le vaai a lenei itumalo i le Tulafono, e momoli atu le agaga faafetai, ona o lea ua toe faaulu mai totonu le tautua faale-lotu. E talitonu lenei usufono ma lenei itumalo, o se itu taua tele lea. Aua o lea sa le mafai ona aofia i totonu o le Tulafono sa i ai, a o lea ua mafai ona faaofi mai, o le agaga faafetai lea. E tele foi le sao o le lotu ma le ekalesia i le taumafaiga o le atinae o nuu ma alaalfaga, ae faapea foi le atunuu aoao. O le mea lea e momoli atu le agaga faafetai.

Na pau lava nai vaega e tau polepole i ai le vaavaai i le suiga o le Tulafono lea ua aumai, ona o lea ua aumai, either o le monotaga faalenuu po o le monotaga o le tautua faale-Ekalesia e agavaa ai le sui mo le faiga palota. A o se manatu la o lenei itumalo ma se fautuaga, e taua lava le aafia uma o mea ia e lua i totonu o requirements ia o le tagata e alu i le palota. Ia e pei foi ona maua i saunoaga ma fetalaiga foi a nisi o sui usufono, e eseese lava nuu, e eseese foi Ekalesia. O le matou nuu ia i tua, e matai loa le tagata, e tatau lava ona fai lana monotaga i le lotu, ae silafia foi e eseese lotu. O isi lotu na o le tiakono e fai lana monotaga, e tai pei o le EFKS. A o le fesoasoani tele lea a le aganuu i le lotu. E ui lava ina fai mai le faavae o le EFKS o le tiakono e fai ai lau monotaga po o lau matafale i le lotu, a o lea ua fesoasoani atili atu le pulega a alii ma faipule, e te matai loa e tatau lava ona fai lau matafale i le lotu. O se vaega lelei lea. Ma o i foi e faamautu ma faamausali ai le mau lea, e mamalu lava le lotu ia e leai se mea e tau faamamaluina le lotu, a o le aganuu, e malu le lotu i le aganuu. O le mea lea e taua ai i lou manatu le tulaga lea, e tatau lava ona aofai uma mea ia e lua i requirements o le tagata e fia alu i le palota.

Sa ou taumafai atu analeila e fesoasoani i lou sui a sui usufono e tau tali le fesili a le Afioga i le Minisita mo Faatoaga, ona o se manatu e faatupu manatu, e taua foi. O le fesili lea sa tuuina mai, e faapefea pe a

teena e le pulega a alii ma faipule le faia o lau monotaga. Ia, ou te manatu foi au ia, e leai lava se mea e aunoa ma se mafuaaga. Atonu foi e ala ona teena e le pulega a alii ma faipule le monotaga a se matai i se isi taimi, atonu ai e le lelei lea matai pe se tulaga faapena. A o le aotelega lava ia, o le maopoopoga o nuu ma afioaga, o le pulega a alii ma faipule e galulue faatasi ai. So, o le aotelega la o se manatu, ou te lagolagoina le tuufaatasi o requirements ia e lua.

O le vaega e fesootai ma le residency, i lou a ia manatu afai e i ai se isi ua manatu e fia alu i le faiga palota, e tatau lava ona sau iinei i Samoa e nofo lelei ai, fai le tautua i le nuu, fai le tautua i le Ekalesia. Ia ofi i totonu o fonotaga faalenuu, e le gata o le vaai, a o le faalogo, e taua uma mea ia, nai lo le tele o le tulaga lea e i ai. Ma ou te manatu foi, ua tuuavana tele le vaega lea o le Tulafono i isi o tatou le mamalu o le atunuu lea e galulue i fafo. A o se manatu vaivai, e tatau lava ona aveese uma organisations na e i totonu o le Tulafono, e aafia ai foi ma government officials la e faigaluega i fafo. Afai o au o la e ou te konesula i o i Peretania, afai ua ou fia alu i le palota, e tatau ona ou faamavae ae ou sau lelei iinei ou te nofo ai i le 3 po o le 5 tausaga, fai lelei le tautua i le nuu ma le itumalo ma le lotu, ia ona agavaa lea e alu i le faiga palota. Aua o le mea lea ua tulai mai nei, ua oo lava foi i nisi o faifeau, tulou, ua le faamaoni foi i le sainiga o pepa ia e tuuina mai le Ofisa o Faiga Palota e tau mai ai, o le tagata lea e ala ona nofo i fafo ona o tulaga ia. E pei o mea ia e tatau ona liolio i ai, aua o faifeau foi ia o tagata soifua e le o ni agelu.

Ma le isi la na itu taua e fia agai i ai se manatu, o le saina lea a le pulenuu ma matai o lea e faauluina mai le sui tauva, sa i ai lava sina feteenaiga na i ai. Fai mai le talitonuga o nisi tagata, e tatau lava ona saina le pulenuu ma matai i le faauluina o le sui tauva. Ae fai mai le talitonuga o le isi tagata, seiloga lava e meet requirements ia e aumai i le Tulafono ona faatoa mafai lea ona saina le pulenuu ma matai o lea e faauluina mai le sui tauva. I lou la manatu vaivai, a e saina i se mea, e tatau ona faataua lau saina. O lea ua tuu atu ia i latou nei le responsibility e vaai ma faamautinoa lelei, o le sui tauva lea ua tolu tausaga talu ona nofo iinei ma fai le tautua. A leai, e le tatau ona saina. Ae a faapea o le vaega lea o le process tau ina faamalie le process ma le faagasologa o galuega a le Ofisa o Faiga Palota, ia ona i ai lea o sou popolega i le vaega lea. Ae tatau ona faataua le saina a pulenuu ma matai o le nuu. E le tatau foi ona tilotilo pito tasi pe faaituau la latou galuega. O i latou tonu ia o lo o malamalama lelei i le faagasologa o galuega ma le tautua i totonu o nuu ma Ekalesia. Lea foi la ua toe tuu atu i totonu ma le isi saina faaopoopo lea e aafia ai le afaigaluega, ia ua tatou toe faaopoopo le isi mamafa foi i luga o le isi mamafa. A o lou lava ia talitonuga, e tatau i le pulenuu ma matai o lea ua saina mai le pepa e faaulu ai se sui tauva ona tilotilo i le latou faamaoni. O le manaia ia o le lauga a le tatou faigalotu anapo, tuu le pepelo, faamaoni i le faia o tatou tiute. O lea foi ua uma ona faia le tatou tautoga, e faapena se lagona. Ae le faapea la na ona saina foi lea ona pasi lea o le polo, ae

tatau ona e accountable i le mea o lena e te saina ai. E pei o se teuteuga lena o se manatu o lena itumalo e faaleleia atili ai le vaega lena.

O le isi vaega e tatau ona silasila i ai, se i vaavaai i le tulaga lea ua aumai e le Tulafono e faasa ona toe withdraw lou igoa mai le faiga palota pe afai ua maea ona faaulu pe maea foi faamasinoga. Ae se i vaai ifo lava i le vaega lea pe le aafia ai le aia tatau a le tagata i le suiga lena o le Tulafono.

I le vaega mulimuli lau Afioga i le Fofoga Fetalai, o palota faapitoa. E pei e tau feteenai le toe tatala o palota faapitoa ma le mafuaaga o la e taatia i totonu o le Tulafono Autu. O le mafuaaga la e i totonu o le Tulafono Autu, ia palota le tagata i le mea o la e alaala ma papaaao ai, a o lea foi o le a tatou toe o e faataga le palota lea faapitoa ua toe soli atoa ai le agaga o le Tulafono Autu. Sa i ai lava lou manatu vaivai, e tatau ona faataga le palota faapitoa i le emergency lea e i ai tatou, le Koviti-19. Sa tatau ona faataga ai. Ae mo le vaaimamao, sa tatau lava ona faatau le agaga o le Tulafono Autu. E ui i lea, pei sa faapena foi le mistake lea na tatou faia i le faiga palota tele. O le mea na tulai mai, e o atu le mamalu o le atunuu e sui mai a latou palota i le mea lea e nonofo ai, e le mafai ona sui. Na faapea mai le Ofisa o le Faiga Palota, seiloga e atoa le 10 tausaga faatoa mafai ona liliu lau palota i le mea la e te nofo ai. Sa tatau lava la ona tuuavanao le Tulafono e faaoga pea palota faapitoa i le palota talu ai ina ia mafai ona accommodate ai le need lea e tulai mai, semeamanu e leai se vevesi e tulai pei foi ona saunoa ai le tele o sui usufono. Ae ui i lea, o se vaega lelei foi le toe tatala o palota faapitoa nei, a o le fautuaga e tuuina atu i le Komesina o Faiga Palota ma le Ofisa, e tatau ona galulue faatasi le Komesina o Faiga Palota ma le Matagaluega o Fuainumera ia matua faamautu lelei lola palota, ia accurate lola palota. A faapea e mautu tatou lola palota, palota le tagata i le mea o lo o nofo ai, ona leai lea o se mea tatou te popole ai i le toe tatala o palota ia faapitoa, o le a faafaigofie le galuega mo tagata uma, a o lea e sosolo i luga o le manatu autu o le Tulafono Autu, ia palota le tagata i le mea o lo o alaala ai.

E ese le taua o le mea lea na saunoa i ai le Afioga i le Minisita o Faatoaga i le taimi ua sola ma aumai foi nai nisi o afioaga lea e aafia i le tulaga lea. Ae pei lava o le itumalo foi o le Afioga i le Minisita lea e aafia ai foi i le 500 lea. E le iloa po o le 500 lea na tigaina le Afioga i le Minisita e tau ave i Savaii, sa le tatau ona palota i Savaii, sa tatau ona palota iinei i Apia po o Vaitele. O se faataitaiga lena e tuuina atu ia e vaavaai i ai, e aoga mea tutupu e faufau ai le tatou Tulafono, ia ma le agai i le lumanai. Ia pei na o le pau ia o nai vaega.

**FOFOGA FETALAI:** Faafetai. Ia se i tulai mai lau Afioga i le Minisita o Faatoaga leaga o lea ua taua lou itumalo.

**Susuga Hon Laauli Leuatea Polataivao Fosi:** Ia o sina mea laitiiti lava lea. Sa leai lava se agaga e faalavelave i le saunoaga a le Afioga ia Lupematasila. Ia, e sao lava oe, e toe faasao atu foi oe. O le agaga lea

na tau aveatu i le mataupu lea o le sulufai o le tagata e tau fia alu a ua le mafai ona alu, o lea na tupu. Na tupu i Vaitele 3. O le tagata e palota ma nofo i Faleata, ua na o le palota, ae ua le mafai ona alu i le palota. Aisea? E le malie le pulenuu e saina le pepa, le malie le sui tamaitai. O fea la o le a sulu i ai lenei tagata? O le mafuaaga lena. Afai o lea ua e nofo i i, tulou foi le tau o le itumalo, if you are entitle to vote, you are also entitle as a candidate. O le mafuaaga lena na ala ai ona mafua ona taumafai le mea lea, ina ia maua le avanoa o le tagata. E le faapea e mafai ona i ai lau aia tatau e te palota ai, ae fai mai e le mafai ona e alu. O le mafuaaga lena na le mafai ai ona alu si a matou sui usufono i ina. Ioe. Ona ua solasola solo le pulenuu, ua fiu e tuli. Ia, na ifo lava, na ala ai ona faatulai mai le Afioga ia Lealailepule e leai se palota.

O le tulaga foi lea ua e saunoa i ai i nai tagata ia ua faatetea ma le nuu ona o le pulega a alii ma faipule, e i ai itumalo e mapo le tulaga lena, ae i ai foi itumalo ua faaoga sese le power e lamalama ai le aiatatau a le tagata o lo o fia alu. Ia e pei o le lagona lena, e le o se isi tulaga, ae ia faamanino ma faamalamalama ia paleni lelei le aiatatau a tagata uma e o i le palota. Ia ma lou faaaloalo.

**FOFOGA FETALAI:** Faafetai. Ia, ou te iloa le sui usufono mamalu o lea ua manino lea tulaga, ae faauma maia le saunoaga.

**Afioga LUPEMATASILA GALUMALEMANA TOLOGATA TOGIA TILE LEIA:** Ia faafetai, o lea o le a faauma atu. E taua tele le manatu faaalua foi o le Afioga i le Minisita. E pei o le vaega tonu lava lea o lea sa tau fai atu ai se manatu. Afai ua refuse le pulenuu e saina le pepa a le sui tauva, e tatau ona molia le pulenuu, ave i le tulafono aua o i ina e suesue ai le auro i le afi, ia po o le pulenuu e sese, po o le finau vale o le sui tauva. Ae taua tele le finagalo o le Afioga i le Minisita e pei ona tuuina mai.

Ia ona faauma ai lea o se manatu vaivai o lenei itumalo, e avatu foi malu i puega i lau Afioga i le Fofoga Fetalai ma le mamalu maualuga o le Palemene, o le a foi se lafoga ua le tautamalii i la outou faafofoga, ia e leai e manatu e vaatele i ina e magalo ai so matou le atoatoa. Ae ia manuia tele lau Afioga i le Fofoga Fetalai faapea foi le Palemene. Faafetai.

**FOFOGA FETALAI:** Faafetai. Malo saunoa, faafetai foi le faasoa mo le tatou Tulafono.

Oi, o lea ua matau atu o lea ua sauni mai le sa o le sui usufono matua, le sui usufono mamalu mai Siumu, Hon Tuuu Leota, ia lou avanoa.

**Tofa Hon TUUU ANASII LEOTA (Siumu):** Faafetai i lau Afioga i le Fofoga Fetalai mo le avanoa. E talitonu foi o paia ma mamalu o taeao ma le aso o le a le toe oo i ai se faamatalaga, aua e talitonu o lea ua maea ona paelago saunoaga foi a nisi o sui usufono mamalu ma

fetalaiga i sui usufono mamalu o le Palemene lenei i le taeao ua fano ma le afiafi nei.

Ae lau Afioga i le Fofoga Fetalai, e puupuu lava se mataupu e fia talanoa i ai i lenei Tulafono, o le Tulafono Tau Faaofi o Teuteuga o le Tulafono o Faiga Palota. E manatu o lea ua maea ona saunoa le tele o sui usufono i mataupu foi sa manatu e fia fai i ai aise faamatalaga. O le tulaga lea ua i ai o lea ua faataoto mai e le faigamalo fuafuaga mo le faagasologa o lenei Tulafono, ma ua faapena ona faagasolo ai, ua le uia ai nisi o tulaga masani o le tatou faiga faavae. Ou te talitonu lau Afioga i le Fofoga Fetalai, o le agaga maualuga lava o le Faigamalo o lo o i ai nei ina ia taoto i le agatonu le tatou faiga faiga palota laitiiti o lo o loma nei. Lau Afioga i le Fofoga Fetalai, e ui lava la i ni a matou faitioga ma ni o matou manatu, a o upu a le atunuu, ia ua pule lava Sitafune ia i le la o lona vaa. Ma ou te talitonu foi o le naunautaiga o le Palemia ma le Faigamalo, ia tatou taunuu, ia tatou taunuu i se taunuuga lelei. O le agaga foi lea i le Taitai ma lenei foi Vaega Faaupufai o le Itu Agai ina ia tatou galulue faatasi ma tatou finafinau pea ina ia tatou maua se manuia mo Samoa mo a taeao.

Lau Afioga i le Fofoga Fetalai, e mafai ona ou faapea atu o le tatou finauga lea o lo o fai nei i le teuteuga o lenei Tulafono, e mafai ona ou fai atu o le misitelio, o le upu masani a le matou Ekalesia. O le misitelio le mea o lo o tatou finafinau ai nei. Aua lau Afioga i le Fofoga Fetalai, e le silafia e lenei Itu pe silafia foi e lenei Itu le taunuuga po o fea e lilifa i ai lo tatou naunautai ina ia teuteu lenei Tulafono. Ae i lou la manatu lau Afioga i le Fofoga Fetalai, tatou o ia i lea vaa. Ae na o nai vaega ia o le Fuaiupu 5, Fuaiupu 8, na ona ou toe faapipii atu i ai, o lea ua maea ona saunoa i ai ma fetalai i ai nisi o sui usufono, ua taliaina foi e lenei usugafono, o le tasi lea o le aso palota mo le aumatutua. Ua talafeagai foi lea fuafuaga, ae i ai lava le tuualalo foi, pei e matagofie foi ae uma loa le faiga palota lea ona lau mai loa lea o le iuga. Aua e talitonu lau Afioga, ia manatua foi o faaiuga e moea e masalomia foi, pe i ai foi se tulaga e faatogafalea. O le tuualalo lenei lau Afioga i le Fofoga Fetalai, ina ia vave ona tau mai iuga pe a maea i le aso lea muamua.

Ae faafetai foi o lea ua toe faatulai mai le faia o tatou fale palota faapitoa ia i Apia. Masalo o se tasi lea o sese o le mea lea sa i ai muamua, ae faafetai o lea ua toe faatulai mai le faiga o fale palota ia faapitoa i Apia. E talitonu lava e fai foi si toatele foi o lou itumalo e le mafai ona palota. Sa manaia lava le taimi sa i ai muamua, sa fai lava palota i Apia nei mo i latou i tua. Ia sa vaaia foi ma le alofa i e sa faapena ona tau malaga i Savaii. Ia o se faamamaavega lea lau Afioga i le Fofoga Fetalai.

Ia na o nai manatu ia sa manatu e tu atu ai e fai se manatu i lenei Tulafono. Ae maumau e pe a na faapea o aumai ai ma se teuteuga i se vaegatupe foi lea e faaoga e sui usufono, maumau. Ia ma aumai ai ma se teuteuga foi lea e matua faasa ai ona toe fai se tagi, ona o le manatu alofa lava i le mamalu foi o sui usufono na filifilia mai e itumalo, ae ua faaleaogaina ona o nei lava mea o faamasinoga. E matagofie lau Afioga

se i silasila ane i ai pe a tatou oo i se isi taimi. Ae mo le taimi nei, tatou agai ia faapea i ia tulaga.

O le faamatalaga puupuu lea lau Afioga. Ae ou te le i nofo i lalo, se i silasila ane lava lau Afioga po o i ai se mea, o lea e misi mai lenei itumalo po o se galo nimo po o se galo sio, e le o i ai se komiti. Pe i ai se mea o faaletonu pe le taua lenei itumalo. Ae faafetai mo lou avanoa. Ia manuia tele lau Afioga i le Fofoga Fetalai, manuia le Palemene, manuia Samoa ma le tapuaiga.

**FOFOGA FETALAI:** Malo lava faafetai, malo saunoa, malo foi tanoa. Ia atonu o lea ua maua le tulaga lea o tatou komiti, ia o lea foi e faafogafoga mai le Afioga i le Taitai o le Itu Agai ma le Sui Taitai, pei o laua ia o lo o i totonu o le komisi, atonu o se taimi feiloai atu i lau Afioga.

Ia, o lea ua matau atu o lea ua tulai mai le sui usufono mamalu mai Safata 1. Ia, o lou avanoa lenei.

**Afioga LEANA RONNIE POSINI (Safata 1):** Lau Afioga i le Fofoga Fetalai, faafetai ua maua foi se avanoa o lenei itumalo e faaali ai so matou manatu i le Tulafono. Ia, ae o le a tuu atu loa, e talitonu foi e le tele ni manatu i le Tulafono Tau Faaofi. E momoli ai le agaga faafetai tele i lau Afioga i le Minisita. Na pau lava le mea e fia agai i ai sa matou tala, o le mea lea o le monotaga, monotaga faalenuu. O lea foi ua taua le monotaga faalelotu. O le taua ia o lou manatu i le mea lea o le monotaga faalenuu, leaga o i e saili ai le tofa. E leai foi se faleaoga o le mea lea o le sailiga o le tofa ma le faautaga na o totonu lava o le Maota o le fonu a le nuu e te maua ai le tofa ma le faautaga. O i foi e te iloa ai le taimi e faasolosolo ai ou manatu i totonu o le fonotaga a le nuu. Aua e ave loa oe ma matai, o lea o le a fai oe ma... o lou sao lea, o lou tiute lea, o oe o le matai e te faasoa i le pule i totonu o pulega a alii ma faipule. O le ala lea o le taua ia i lou manatu, o le taua ia o le monotaga faalenuu.

Ae o lea ua toe aumai nei o lea ua i ai ma le monotaga faalelotu, o lou talitonuga ou te le au i le mea lea o le monotaga faalelotu. O le atunuu lenei o Samoa, aua e pei e tau mai o le monotaga, e pei o sou tiute foi lele e fai. A o le tatou Malo o Samoa, e i ai lava lona faaupuga lea ua iloa ai Samoa i le lalolagi, e faavae i le Atua Samoa. O le fua o lau tala, e soifua mai loa le Samoa, e te alu loa i le lotu, fai lau taulaga i totonu o le lotu, mai lava i lou pepe meamea e agai loa i le falesa. E le o se tiute la le mea lea e taumafai mai i ai le tatou Tulafono, o lou lava lea talitonuga, o le vaega o le soifuaga o le Samoa, o le lotu, leaga o i lea ua maua ai le talitonuga o Samoa, o i lea e maua ai le manuia faaleagaga, o lea e maua ai le manuia faaletagata. E le o sou tiute la le taumafai e tau tulei oe e faailoa lau galuega i totonu o le lotu, e leai o le mea na soifua mai loa... e oo mai lava i le taimi lenei. O outou foi ma tatou uma lava, e ola mai loa outou alo ma tatou fanau, momoli loa i le lotu. O i e ave i ai a tatou fanau, aua o lea ua tatou iloa, o le manuia lea.

Ia au la ia i lau lea... aua i lau foi lea matau i totonu o le tatou Palemene nei, o le toatele lava o tatou e le tasi se Ekalesia e tautua i ai, o le toatele lava e 2, 3, 4 Ekalesia o la e tautua ai. E mafua i se a? O lea ua mauaa lou loto o le manuia lea, o lou manuia lea faaleagaga, o lou manuia lea faaletino, e augatupulaga lou manuia lea. E le o se mea la e tau faailoa i totonu o le Tulafono e faapea mai e tataua ona i ai lau monotaga faalelotu. I lau lea matau i le tulaga lea, pei ua tau matau atu, pei o se mea o se alofaga foi lea. Aua o tatou uma lava Samoa na tatou feola mai, soifua mai loa ma ola, agai loa i le lotu, tautua mai lava i ina e oo mai i le aso, tatou uma lava. Ae pei o lea ou te tau matau i le Tulafono, pei o se mea o le monotaga, o sou tiute tauave i totonu o le lotu. E leai, o le vaega o le soifuaga o le Samoa, leaga e faavae i le Atua Samoa. O le soifuaga lena tatou te soifua ai. O au la, e le se mea faapea e te tau alu e fai lou tiute lea o le monotaga faalelotu ona e agavaa ai lea. E leai, o le vaega o le soifuaga Samoa, o le alu lava i le lotu, tautua faalelotu.

O lona lua o lou manatu, o le mea lea o le 3 tausaga lea ua tatala i tua, lea ua faapea mai so o se taimi lava e i tua atu po o le fia, e le o manino lelei foi lea mea. O lona uiga e 3 tausaga na e agai ai po o le 20 tausaga talu ai ae e sau e toe fia agai i totonu, ia ailoga e talafeagai lea i lau vaai. O e o la e faia le nuu i lea taimi, tautua i lena taimi, e faapena lou lagona, ou te le au foi po o le a le umi e alu ai i tua lau tautua na ona e toe sau lava e fia alu i le palota.

Ia, lau Afioga i le Fofoga Fetalai, o nai mataupu ia e fia tuu atu i lau Afioga i le Minisita, ia manuia tele le Fono.

**FOFOGA FETALAI:** Malo saunoa. Ia o lea e matau atu o lea ua tulai mai le sui usufono mamalu mo Faleata 4, le Igoamatua lau Fetalaiaga Ale.

**Tofa ALE VENA ALE (Faleata 4):** Lau Afioga i le Fofoga Fetalai, e momoli atu le faafetai i lau Afioga mo le avanoa foi ua taoto mai i lenei itumalo e faaali ai se sao aua le tatou Tulafono ua i lumamea nei o le Maota. O lea foi ua uma ona e siitia le viiga ma le faafetai i le Atua aua le tatou taulaga osi i lenei taeao. E momoli atu le faafetai tele i lau Afioga i le Fofoga Fetalai, ua maea foi ona paepaeulufanua paia o le tatou taeao, aua paia faaleatunuu, paia faale-Malo aemaise foi paia faale-Ekalesia, aemaise foi le paia tele o le Maota o le Palemene i lenei taeao liugalua.

Ua ou tulai atu ma le faaaloalo tele e fia faaalia foi se manatu e tusa ai ma le Tulafono ua i lumamea nei o le Maota. Ma i le folasaga malamalama a le Afioga i le Minisita e ou le Tulafono, o lo o manino lava. Ua aumai le Tulafono ona o mataupu ia lea ua lauliliuina nei i le taeao liugalua lenei, o nisi o mataupu sa laga i le faamasinoga. Ma ua aliae manino mai foi e i ai ma nisi o i latou sa le agavaa i le faiga palota tele lea ua tuanai atu, lea o le a agavaa nei i le teuteuga lea o le Tulafono lea. Ia, ma ua see le vaa o le Malo, o lea ua taoto le Tulafono.

Ou te le toe oooo foi la i tulaga e pei ona saunoa i ai le toatele o sui usufono i le itu tau monotaga ma mea uma ia pei ona i ai le Tulafono lea i lumamea nei o le Maota, o lea ou te manatu ua lava lea i le faafofogaaga a le Maota.

A o le itu ou te fia tautala i ai lau Afioga i le Fofoga Fetalai, ona o le tulaga lea i le aganuu, le tuaoi o le aganuu ma le faatosina. Atonu e tetele nisi teuteuga o le Tulafono lenei o Faiga Palota e pei foi ona saunoa i ai nisi foi o le Maota pe a maea le tatou faiga palota laitiiti. Fai se komisi suesue ona e popoe lou taofi ona o lea foi o le a fai tatou palota laiti nei, ma e le ma iloa e ono toe oo uma foi palota nei i le Faamasinoga, i tagi ma faiga faatosina e faaulu foi i luma o le Faamasinoga. O le mea lena o lea e popoe ai le taofi. Ua le iloa po o fea e tuaoi ai le faaogaina o le aganuu ma le faatosina. A tatou matau i le faiga palota lea na tea nei, e le tau faamatalaina le faafogafoga a lo tatou Maota, o la e foi e faafogafoga tapuai mai le tatou atunuu i le tele o faiga faatosina, tufaga o tupe. Ona oo lea ua oo i le faamasinoga ua faaulu tagi, ia ona sau ai loa lea i tua o le mea o le taumafai e settle cases nei. Na tulai mai loa lea o le isi tulaga aupito sili ona matautia ma ogaoga o le tulai mai o le taumafai e settle cases nei i le ofoina o ni tupe tetele. Ou te le fefe lava e tautala i le mea faamaoni lau Afioga, e oo atu lava i le tai \$30,000, tai \$50,000, tai \$100,000 e taumafai ai sui usufono e settle cases nei i tua. O le a le mea ua tulai mai? This is the most corrupt and illegal practice in the arena of politics in this country. Lau Afioga, e tatau ona silasila lelei le Faigamalo...

**FOFOGA FETALAI:** Ia, ou te fautuaina le sui usufono mamalu, ona o lea ua oooo i tulaga ua faailoa mai le... ma tupe tetele. E te silafia foi o mea uma lava nei e paia loa le Maota ma ana tualumaga, e tatau ona i ai ni mau faaalua. Ae talitonu foi, ia faamama ia le sausu a lau Afioga i le sui usufono mamalu, ua tetele na mau miliona ua oo i ai e leai ni faamaoniaga.

**Tofa ALE VENA ALE:** Faafetai i lau Afioga o le a ou see ese ma le mataupu e pei ona ou faailoa atu.

**FOFOGA FETALAI:** Faafetai.

**Tofa ALE VENA ALE:** Ia, ae tau lava ina taoto atu i ina e filitagaga i ai le tofa ma le faautaga oooo a le tatou faigamalo o tulai mai nei, aua o mea ia o lea e tutupu. Ia, lau Afioga i le Fofoga Fetalai, ua ou usitaia lau faatonuga.

A o mataupu uma e pei ona momoli mai le Tulafono ua taoto mai lau Afioga i le Minisita, ua talia foi e le itumalo o Faleata 4. Ia manuia tele le Fono faafetai.

**FOFOGA FETALAI:** Faafetai. Malo saunoa. Ia, o lea ua ou vaai atu o lea pei ua tu mai le sui usufono mo Faasaleleaga 5.

**Afioga Masinalupe Makesi Masinalupe (Lefaga ma Faleaseela):** Lau Afioga i le Fofoga Fetalai, se i vasai foi, e manaia foi le felafoai o o ma iinei pe afai e tusa ai ma lou finagalo. Ae ui i lea, o lea ua e saunoa.

**FOFOGA FETALAI:** Ia, leaga o lena ua e saunoa. O lea ou te vaai atu o la e ua tulai mai le sui usufono mo Faasaleleaga 5. Ia saunoa lau Afioga i le sui usufono.

**Afioga PESETA VAIFOU TEVAGAENA (Faasaleleaga 5):** Ia, faamalulu atu i si ou uso a sui usufono, o Satuala lena ua muamua atu i luga o le Maota. Lau Afioga i le Fofoga Fetalai, e momoli atu le agaga o le faafetai ua maua foi le sao o lena itumalo e molimoli atu ai foi ni nai manatu e lagolago ai foi le tatou Tulafono.

E muamua foi ona momoli le faafetai i lau Afioga i le Minisita, ona e i ai nisi vaega o le Tulafono lena ua saunoa foi i ai nisi o sui usufono, e faalogologo foi ma le totoa i nisi o finagalo aemaise lava o tulaga ia tau le palota o special votes.

O le agaga faafetai i lou sui usufono, ona e talitonu i le taua sa i ai le Tulafono lea i le palota lea na se i mavae atu nei. Ae ou te talitonu e le mafai ona tatou iloa ni faafitauli ma ni mea e tutupu mai seiloga e faatino le Tulafono. Peitai la i le matou matau, aemaise lava matou mai le motu tele i Salafai i nai faafitauli ia, ona o le aso tonu lea lau Afioga, o le aso malolo e le feoi ai ni pasi foi nei e felauai ai le mamalu o le atunuu. Atonu o le tele o tagata o nai o matou foi itumalo e le i palota. O le tele foi o tagata ua le mautonu ona o le tulaga lea ua tele lava ua fau i le uafu i Salelologa, ae ua tau le maua taavale foi nei ona o le aso malolo o le aso o le palota. O se isi foi manatu ua toe vaavaai i ai, pe a faapea o le aso o le palota ae fetai ma ni matagi malolosi le feoi vaa. Ia pe atonu tasi lea faafitauli e silasila i ai lau Afioga i le Minisita. O le agaga lea e momoli ai le agaga o le faafetai i lena foi teuteuga o lea o le a maua foi le tulaga faigofie lea, aua o lea ua vaavaai atu i le Tulafono, o lea o le a toe foi lava i le mea sa i ai tatou palota faapitoa foi nei i totonu o Apia.

Ae ua ou tulai atu lau Afioga i le Fofoga Fetalai e fia faaali se manatu i le tulaga lava lea tau monotaga ona o le tele lava o nuu ma afioaga e eseese pulega, e le tutusa ma isi afioaga. Ma e i ai feteenaiga i le va o monotaga nei faalenuu, ia, monotaga po o matafale faale-Ekalesia.

Ae silasila foi lau Afioga i le Fofoga Fetalai, o ai lava se Ekalesia e fia ulufale i totonu o se afioaga, e ao lava ona aumai le talosaga i totonu o lea nuu po o lea afioaga, e ui lava i ala o mea. E ui lava i ala o mea. O le ioega foi la a le pule mamalu a alii ma faipule, e mafai ai ona faaulufale mai lea Ekalesia ma lea Ekalesia. O lona uiga, e vaavaai lava Ekalesia i le pulega mamalu a alii ma faipule i taimi foi ua ulufale mai ai i totonu o lea afioaga ma faatino ai foi le Ekalesia. O le agaga lena e pei e faataua ai lava e lou sui usufono le tulaga lea o le monotaga faalenuu, aua o le monotaga faalenuu, ua i ai uma lava ma lau tautua i

totonu o le Ekalesia. Aua silasila foi lau Afioga, mai lava ia i tatou e masani i le tulaga lea o le tausinu, mai lava i le laitiiti, a oo i le Aso Sa fai le suavai, o le umu a le faifeau i i, o le umu a le isi faifeau. E le o faailogamea le tagata tautua, ioe. Pe tele lava Ekalesia i totonu o le nuu, a o le tautua lava ia a le tagata e tausinu, e le faailoga Ekalesia. E faapena foi la i faalavelave fai pei o maliu ma mea faapena. Afai la o le faataitaiga o au o le EFKS ae fai se maliu i lou aiga, ia e ao lava ona ou aumaia uma faafeagaiga foi o Ekalesia e auai, ia e faatino lava le aganuu ma faaaloaloga mea faapena. O lona uiga, o lea lava e sosolo le tautua lea faalenuu, e aofia faatasi ai ma tautua faa-Ekalesia.

E i ai le mea na tupu ae ou te le i oo mai i le Palemene lenei i se tasi o afioaga o si ou nuu i Savaii e le o lou afioaga o lo o ou tulai mai ai, na sulu mai ai le Peresetene o se tasi o Ekalesia ia te au, e moomia lau fesoasoani, ona ua taofi e se tasi o pitonuu o lou afioaga le Ekalesia lea. Ua uma ona fau le malumalu, peitai ua taofi. Ia atonu o la e faafogafoga mai si ou nuu. Sa matou malaga lea i Savaii e taumafai se auala e teuteu ai le mataupu, ma le galo ia te au, o le lua ai lea o Ekalesia o lea ua aveese o si pitonuu lea. O le mea moni lava lau Afioga i le Fofoga Fetalai, ua leva ona fale le mataupu ma taumafai, na iu mai lava i le Tulafono. Ma na aumai foi le finagalo o le nuu ia i totonu o le faamasinoga, i mea ua le tusa ai ma tu ma aga faapulega foi a le nuu ua le tausia e nisi foi o Ekalesia. Ma sa fai le faaiuga a le faamasinoga, se tasi foi o Faamasino Sili, ona fai lea o le faaiuga e faapea, a toe tulai mai le mataupu lenei, ia o le a le toe maua loa se isi avanoa e toe faaulufale ai le isi la Ekalesia e ese mai le Ekalesia lea na ou taumafai e galue ai. E pei la lau Afioga i le Fofoga Fetalai o lea ou te taumafai e faamatala atu, le taua tele o le monotaga lea faalenuu, ioe. Ona e pei e foliga mai a tatou taumafai e aumai le monotaga lea faa-Ekalesia i totonu, o le mea moni lava lau Afioga, o le a tele le feteenaiga, leaga e le tutusa uma afioaga. E i ai isi afioaga e pei e vaavaai lava latou i le faaleaganuu, ioe. E i ai foi isi Ekalesia e va ma isi Ekalesia i totonu o nuu ma afioaga. E le faapea e sese lau faamatalaga. E fetotoai foi va o Ekalesia. A o le popolega lena o lou sui usufono lau Afioga i le Fofoga Fetalai, ona o lea e pei ua matau atu o le a aumai faatasi monotaga nei e lua, po o le faaleaganuu po o le faa-Ekalesia, ona mafai ai lea ona maua ai le avanoa e alu ai le tagata. A o le fesili la lau Afioga, afai nei la a o se tagata o se Ekalesia o lea e va lava ma le nuu ma fai i ai se faaiuga a le nuu i lenei tagata, ia o lea la o le a sulu mai le tagata lenei e sau iinei aumai i le Tulafono, ia pe aumai foi le faafeaiga e molimau... e pei o nai tulaga na lau Afioga i le Fofoga Fetalai, e tupu pea faafitauli. Ae ou te talitonu, i monotaga lava ia faalenuu, e aofia uma lava tautua faale-Ekalesia a le tagata o lo o nofo i le nuu ma tautua le nuu, ioe. Aua a e tautua i lou nuu, e fai uma lava au mea faalenuu. O faaaloaloga foi i le faale-Ekalesia, e leai e leai lava se isi na te le faia, aua e pei ona ou fai atu, e tupu faalavelave i totonu o aiga i totonu o nuu. E le faapea la na o lata Ekalesia e ave i ai lata faaaloaloga, e leai. E faasoa lelei lava se faaaloalo a se tagata i ona faafeagai uma i totonu o lona nuu ma lona

afioaga. Na pau lava lena o se vaega lau Afioga e te tilotilo i ai ina ne i avea ma mea e fai ai feteenaiga, a o lea o lo o taua pea le monotaga lea faalenuu. Aua o lea lava a e tautua i lou nuu, o lea lava e fai lau tautua faa-Ekalesia.

Ia pau lava lea o se vaega lau Afioga, ae lagolago e lou nei sui usufono lau Afioga i le Minisita ma nisi o teuteuga ia ua i ai. Ma lou faaaloalo lava.

**FOFOGA FETALAI:** Faafetai o lea ua maua atu. Ia malo saunoa i lau Afioga Satuala, le sui usufono mamalu mo Faasaleleaga 5.

**Afioga Masinalupe Makesi Masinalupe:** Lau Afioga i le Fofoga Fetalai...

**FOFOGA FETALAI:** Ia tulai mai le sui usufono mamalu mo Lefaga ma Faleaseela.

**Afioga MASINALUPE MAKESI MASINALUPE:** Ia, faafetai i lau Afioga i le Fofoga Fetalai mo le avanoa. Ia, o paia ma sa ma faiga o le Maota, o le a nuunuu faatini o taulaga, o le a le toe oo i ai se faamatalaga. Na pau o lea, na ona ou fia fonofaapipii pei ona molia e le Fofoga Fetalai le tatou faafetai i le Atua i le taeao ua fano. Ia, tatou aufaatasi aua o Lona mana lea tatou te maua ai le filemu.

Ia o le a taumafai atu se lagona o lenei foi usugafono e tusa ai o le Tulafono Tau Faaofi o le Teuteuga o le Tulafono o Faiga Palota. E manatu o lea ua tele ina oooo foi saunoaga ma fetalaiga i le tulaga pei ona i ai monotaga, o lea lava foi ua fetuutuunai ma ua faaalua foi finagalo. Ae ou te talitonu foi na se taimi lava ou te oo i ai, ae le umi foi se manatu o le usugafono mai Lefaga ma Faleaseela. Ou te manatu i le tulaga lenei o le monotaga, aua e monotaga i le faalenuu ae matafale i le faalelotu. O tatou uma na soifua ma tatou ola mai totonu o nuu. E amata mai lava ... ou te talitonu lava o lou talitonuga e amata loa ona soifua ma ola mai le tagata amata loa lana tautua o le monotaga, aua e agai mai lava i le taulealea ae le i oo i le matai, sa tautua lava i so o se vaega, e leai lava se mea e misi pe afai lava o lea sa e soifua mai totonu o le nuu. O tulaga faapea, e tatau ona toe amanaia, aua o le faagasologa lava lea o le tautua, e sau lava mai le tamaitiiti seia oo lava ina avea ma matai, e ave i ai le faaaloalo. E ui lava ina eseese ma i ai eseese i luga o le tau faaofi mai foi o le Tulafono lenei o le monotaga, atoa ai ma le tautua i totonu o le lotu, ia e pei lava ona malie foi i saunoaga, e eseese lava Ekalesia, ae fai lava ma lou manatu i totonu o le matou afioaga ma alaalafaga, e tofia loa le tagata e avea ma matai, e tatau foi ona fai sana matafale, o lana monotaga lava lea faalelotu. Ia ina ne i te i ua eseese ma nisi talitonuga, ae ou te talitonu lava e i ai le vaega e mafua ai ona tupu le mea lea, ae faafetai i le Afioga i le Minisita o le Komisi o Faiga Palota i le toe aumaia o lenei teuteuga. Ou te talitonu o nei lava

teuteuga mo le nofo filemu ma le fetuutuunai i le tulaga e maua ai le maopoopoga.

Ou te lagolagoina le Tulafono ae pau lea, o le vaega lona lua, o mea ia o palota faapitoa po o le feoi i faiga palota. Ou te talitonu o le mea aupito i sili ona taua i le vaega lea o le kilini o le lola. O le mea lea e foia ai le faafitauli ia i lou talitonuga, leaga o lea sa maua foi lava pei ona i ai foi le mataupu a le tina ia Lolomatauama, o lea lava sa ave i ai le faamamafa a Lolo i le mataupu lea, ia kilini le lola. Aua o le mea aupito sili ona taua ai le vaega lea, e le talafeagai le omai o nisi e ese mai. O le tala faatusa lava pe afai o le matou nuu, afai e ese ni tagata o lo o omai e filifili le tofi o Lefaga ma Faleaseela, e le taigamalie i totonu foi i si o matou itumalo, leaga e tatau lava ona ifo tonu le fuiniu i le lapalapa, e tatau lava ona filifili lava i tagata i totonu o le itumalo o latou sui, o la e galulue faatasi, nutimea faatasi, faitonu faatasi. Ou te iloa o le mea lea o lea e mafua ai le feeseeseai ma le mea lea o le tele o le feaveai aua e le mafai ona o atu ia... ia afai o lea sa maua i le taeao o 500 nisi e ese o lo o palota i le afioaga lea o Fasitoo, lona uiga ua filifili atoa e nei tagata le sui o le itumalo.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai, o se mea e fia faamalamalama.

**FOFOGA FETALAI:** Onosai mai le sui usufono mamalu se i tuu atu le avanoa i le sui usufono mamalu mo Vaimauga 1.

**Afioga Sulamanaia Fetaiai Tauilili Tuivasa:** E fesoasoani atu i le saunoaga a le sui usufono ona o lea e taua nai afioaga e le o i ai ni sui usufono i totonu o le Maota lenei. E pei o le popolega lena i lou sui usufono, e le o mafai ona tali mai afioaga lea e taua i le lauga a le sui usufono. E pei o sina fesoasoani lena e tuuina atu i lau Afioga i le Fofoga Fetalai e fesoasoani ai i le sui usufono o lo o saunoa nei.

**FOFOGA FETALAI:** Ia, e taua foi le fautuaga le sui usufono mamalu.

**Afioga MASINALUPE MAKESI MASINALUPE:** Faafetai. Faafetai lava mo le fautua mai. Ia o lea la o le a ou see ese. A o le tulaga la lea pei ona i ai le vaega lea, ou te talitonu lava au o le malosiaga lea e puipui mai ai le vaega lea mo le feoi. Aua a mafai ona kilini lola, ia ona o tasi lava lea o tagata ia, e le toe i ai foi se mea lea o le alu fua e sue le mea e palota ai i le isi itumalo.

Ia, e pei o se manatu lea, ae i ai foi ma si fautuaga e tuu atu, ona o lea foi e... ia tatou aloaloese lava ma le taua o le afaigaluega a le Atua. O le mea lea ta te talitonu a ita, o la e i ai, o le faamasinoga lava o le afaigaluega o le Atua. A o tatou ia, fai o tatou tiute ma tatou faiva ua tofofi ai tatou. Ia, ma le faaloalo lava, mo le faasaoina foi o lenei taimi. Faamanuia le Atua i lau Afioga i le Fofoga Fetalai, ia maua foi le

tofa i lau Afioga i le Minisita o Faamasinoga. Ia e lototele, maua lou tomai e faatino ai tiute.

**FOFOGA FETALAI:** Malo faafetai.

**Afioga Auuapaau Mulipola Aloitafua Mulipola:** Lau Afioga i le Fofoga Fetalai pe maua se avanoa...

**FOFOGA FETALAI:** O lea na muamua mai le sui usufono mamalu mai Vaimauga 2 ona sosoo ai lea ma lau Afioga i le Sui Fofoga Fetalai.

**Tofa LENATAI VICTOR FAAFOI TAMAPUA (Vaimauga 2):** Faamalo faafetai i lau Afioga i le Fofoga Fetalai e tusa ai foi ma le avanoa. Ia, o le viiga o le Atua e le faaitiitia, ona mai le taeao analeila seia oo mai i lenei itula o le po o lo o molimauina pea Lona alofa ma Lona agalelei. Ia viia le Alii.

Lau Afioga i le Fofoga Fetalai, e manatu o le a fagatonu loa se lagona e tusa ai foi ma le tatou Tulafono o le teuteuga o le Tulafono e pei ona folasia i le tatou Maota Fono. Ia, e le umi foi se faamatalaga ua matauina e toatele nisi na saunoa i nisi o vaega sa faapena ona fia malamalama ai lou nei sui usufono, ae talitonu o lea ua faamauina e le Afioga i le Minisita. O se taimi ona faapena lea ona tuuina mai lea o sana folasaga e tali mai ai i lea vaega.

Ae pei o le vaega ia e fia faaleo atu lau Afioga, o le manatu lava i le tulaga lea o le tausiga o le mamalu. O lea e matau atu lau Afioga i le tulaga lea i le taatia manino mai o le tulaga lea i le aganuu i le nuu, i matai latou te faamaonia le sui tauva, le vaega lea o le monotaga lau Afioga. O lea e faapea mai, o matai, o le sui o le nuu po o le sui tamaitai o latou ia e agavaa latou te faamaonia le sui tauva. Ae po o le vaega lea e aumai i le tulaga lea faalelotu po o le Ekalesia, e pei e fai lava se le manino tele i le tulaga foi lea e le taua mai po o le faifeau po o ai, ae atonu o se mea lelei foi a le fia auai ai le faifeau i le sui tauva lea, atonu e mafai ona faaoga lona faletua po o le taitai o le autalavou. Na pau lava lena o le popolega, o le tausiga o le mamalu a sau le taitai o le autalavou o lo o i ai lona tofiga i totonu o le Ekalesia, ae le o se matai. Ia pei o le tulaga ia i le tausiga o le mamalu, e pei o nai vaega ia o lea e fia faaleo atu i le Afioga i le Minisita i le tausiga o le mamalu, aua sui tauva mo le tatou Maota nei.

O le vaega lona lua lau Afioga e pei e matauina e tutusa le mamafa o vaega ia e lua, o le lotu ma le faaleaganuu. Ae pei ona saunoa nisi o sui usufono, e sao, e o faatasi vaega ia e lua. O le popolega o lou sui usufono lau Afioga i le Fofoga Fetalai, ne i avea le tagata lea e toatasi i lona manao o lo o i ai e ono lepeti ai le nofo lelei i totonu o afioaga. E talitonu o tatou uma i le Maota nei, e fai a tatou monotaga i tatou nuu, o tatou uma o matai. E fai foi tatou monotaga i Ekalesia, o totonu foi o tatou afioaga. Ae pei o se popolega lena o lou nei sui usufono lau Afioga, ne i avea le sui e toatasi lea, le naunau ia avea ma sui tauva ma

mea e afaina ai le nofo lelei i totonu o nuu ma afioaga. E pei o se popolega lena e fia faaleo atu foi i lenei itula o le afiafi i le tatou teuteuga o lo o i ai i le tatou Tulafono.

Ia ma le vaega mulimuli lau Afioga, o le taeao analeila sa saunoa ai foi se tasi o sui usufono o le autu o nei teuteuga ina ia taofia ai le saisaitia o le aiatatau a le sui tauva. Lau Afioga i le fuaiupu 4 se i tagai ane lau Afioga i le Minisita pe le o saisaitia ai le aiatatau o le sui tauva i lona manao pe faaauau le alu i le palota pe leai.

Ia, pei o nai manatu ia lau Afioga, ia agalelei le Alii i taualumaga o le tatou fonotaga i lenei afiafi. Faafetai.

**FOFOGA FETALAI:** Malo faafetai i le sui usufono mai Vaimauga 2.

Ou te iloa o lea ua sauni mai le Sui Fofoga Fetalai ona oo atu lea o le faasoluga i le sui usufono mai Gagaifomauga 1.

Ia tulai mai le Sui Fofoga Fetalai, le sui usufono mamalu mai Aiga i le Tai.

**Afioga AUUAPAAU MULIPOLA ALOITAFUA MULIPOLA:** Faafetai mo le avanoa i lau Afioga i le Fofoga Fetalai. Ia e manatu ua faatagimoe manu o le afiafi, ua faliu foi le la i lona nofoaga e gata ai lana taamilosaga i lenei aso, a o lo o tumau pea le alofagia o tatou ma le Palemene e lo tatou Matai Sili i le lagi. Faafetai mo le avanoa mo le usugafono a lenei itumalo se i fai foi se motugaafa e uiga i le teuteuga o le Tulafono Tau Faaofi o Faiga Palota.

I lau matau atu e 9 fuaiupu o le teuteuga o le Tulafono lenei. O le mea muamua lava, ou te momoli le faafetai i lau Afioga i le Minisita mo le tapenaga. Faafetai mo le teuteuga o le Tulafono o Faiga Palota. Ia ma o lenei lava Tulafono, e matauina lava a o ou vaavaai mai fafo, e fai lava teuteuga o lenei Tulafono i taimi uma e maea ai faiga palota. E muamua ona ou fia oo i le monotaga, le monotaga lea faalenuu. Ia au lava ia ma lau tilotilo, masalo ona e leai se tusi foi lele po o se dictionary e mafai ona tatou faitau ai po o le a tonu lava le uiga o le upu lea o le monotaga, aua e eseese uma lava le faaliliuga e afioaga o le upu lea o le monotaga. A o lou sui usufono, e mafai ona ou faauigaina le upu lea o le monotaga faaleaganuu, e i ai ona values, e i ai values o le monotaga. E mafua se faamatalaga ona o le tele lava o afioaga o lou auai i fonotaga a le nuu ma e auai i mea e fai a le nuu ma saogamea e fai a le nuu, o le monotaga lena, ma e manino lava o le mea o lo o tupu i le tele o afioaga. A oo foi la ina faasoa palapalamalo ia ona fai lea o le faafaleupoluga foi lele ma le upu e faapea, tulou le Maota, se o lou ai lava o lou nofo mai. O le monotaga lena. E pei lava ona ou fai atu i lau ia faauigaga, o le monotaga e fai lona values.

O le a see mai la sau faamalamalama i le tagata foi lele o le matai o le nuu o lea e nofo i Apia nei, aua e le o se tala e aveane ai, ua tele ina soloai mai tatou mai afioaga i tua ma Savaii iinei ona o le tulaga e saili manuia mo fanau, le urbanization lea ua i ai nei, afai la o le tagata lea e nofo i Apia nei a o le matai i le afioaga i tua, ia, e i ai le matai e auai

lava i fonotaga a nuu, ae peitai e i ai tofiga faalemalo ma ona tiute fai o lo o faigaluega ai i totonu o le taulaga i le taimi lenei. A le i ai la i le tele o fonotaga a le nuu pe na o se vaitaimi foi e auai, e pei la o i ina lea e tau lilifa ai le vaaiga lea e faapea, o lo o see ese lea tamalii e leai se monotaga. A o le fesili la a lou sui usufono e ala ai ona ou talia le Tulafono lenei, e faapei la le afioaga e masii mai i Apia nei i ni faamoemoe tetele o le Malo? E fai la lau tala faataitai i lou itumalo. A faailoga aso tetele o le itumalo, a laititi lava vaa o le Aiga i le Tai e aumai e 4. O le matai la lea e i inei, o le galuega lena a le matai lea e i inei o le alu e asi le afioaga ma le oo mai o le itumalo. O le mea lea na ou taua o le monotaga e fai lona value. A ou nofo foi la ma mafaufau i monotaga ia e fai i afioaga, ou te le o ma iloa po o i ai se afioaga o tusitusi ma faamaumau e se failautusi, o se afioaga i lona tulaga faafailautusi o monotaga ia na sau ai, tulou le Palemene. Pe a faapea o le saogamea na fai e limagamata ma le lauia po o a nisi tulaga faapena. E manino lava e leai se afioaga o faamaumauina. A o monotaga na, o monotaga na o lea e gagana mai ai i totonu o afioaga. Ae a masii mai la le afioaga, lea ua oo mai le afioaga e sauni le pese aua le Tutoatasi. O lea ua masii mai le afioaga aua le latou siva mauuluulu aua le faamoemoe o le teuila. Ua masii mai le afioaga aua le faamoemoe.

A mapu mai la i inei, o i ina e faatino ai le leaga ma le lelei o le matai le e i Apia nei. A oo la ina tago le matai lea e i Apia nei se i teu lona nuu ma faataumamafa le afioaga po o le aulotu, e le o se tupe itiiti. Ou te tau atu e le o se tupe itiiti. E fia mafuta lona itumalo, fia mafuta le afioaga i le itumalo, e tele le seleni e alu ai. Ae a faatusatusa la i le monotaga lea e fai i totonu o nuu. E masalo e le taitai tutusa. A fai lava e misi lea masina e leai ni mea e fai a le afioaga, ua malolo foi le monotaga. A fai e misi lea masina ua malolo foi, ae a faafotutupu pe faafotuolevaaulu, ua maua seleni a tagata fai monotaga. A o le monotaga la a le tagata lea e tasi le aso e masii mai le afioaga faatino lona alofa. E fai la si tele o le seleni. O le uiga tonu la lena o lea ou te talitonu ai, ou te matua talia lelei le teuteuga lenei o le Tulafono. O le monotaga ola lena a le tagata lea e nofo i Apia. Ae le tasi foi se mea e oo mai ai le afioaga. E pei lava ona ou fai atu, e tele mea e oo mai ai le afioaga i inei.

Ae a oo loa i le palota, o lona le auai atu pe auai atu i le afioaga na o se vaitaimi, o i la lea o le a fai ai le feteenaiga lea. O le feteenaiga lea o lea e fai mai ai le Tulafono, ua feteenai alii ma faipule sui o le nuu ma sui o le Malo, e le agavaa le tagata lea e alu. E mafua i se a? E mafua ea ona o le le auai i taimi uma? Ae faapefea le tiute ma le galuega lea e faatino i Apia nei. Galue i le Malo, galue i le Ekalesia pe so o se tofiga lava. O le uiga lea o lea e ala ai ona fai atu le usugafono ma saafifimamate a lou usugafono a lou sui usufono, i le taoto o le Tulafono lea. E faafetai i le Minisita a tapenaina le Tulafono.

O lea la e fai mai ai le Tulafono, a see ese le uluga ma feteenai le tofa i le afioaga i le sui lea ua faamoemoe e alu. O fea la le isi alternative e

me i i ai le tagata lea. Pe a fai foi o le tagata lea, e fai lava lana monotaga faale-lotu, ia tulou.

E le gagavale le tautalaga a le sui usufono, ae i ai Ekalesia e tuua e le aufaigaluega le afioaga pe o le fesuiaga o le aufaigaluega. E i ai foi Ekalesia tulou le gagana, e efuefu lava le aufaigaluega i le ekalesia, ae tupu lava le tusi o le galuega. Ou te tautino atu le mea lena. E matua le tusi o le galuega i nisi o le aufaigaluega. O i ina la, e i ai lou talitonuga ou te talia le Tulafono, ua fai lena ma reference e fesoasoani la i le galuega a le Komesina o Faiga Palota. Aua e i ai monotaga sa amata mai e pei ona taua e nisi sui usufono. O monotaga faataulelea, a o le matafale faale-lotu. Ae na ona matai lava, sifi sao mai lava le matafale faataulelea i le matai faale-lotu ma galue ai loa i totonu o le ekalesia. O lea la ou te matuai talia lelei le mea lea. E leaga e moni lava a tatou tilotilo foi i se isi itu, e mafai foi ona fai ni feteenaiga i totonu o afioaga. Ae tatou te le iloa le tagata lea o le a lona tolu mai, le itutino lea lona tolu, pe sau foi o se tagata e atagia e pipii foi i le isi vaega lea, e musu e alu le sui lea.

O le mea lena ou te matua talia lelei le Tulafono lea tau monotaga.

Lona lua lau Afioga i le Fofoga Fetalai, o le sui ua faaulu lona sui e tauva ai i le faiga palota. Ae mea ane ona toe uia auala faale-tulafono ina ia le mafai ai ona taufetuli ma le isi sui i le faiga palota. E fia avatu se motugaafa a lenei itumalo, i ia foi pioga ma saoga o ia foi tamai Tulafono faapea. A faapea o au ou te fia alu i le palota a e i ai le isi sui lea o le a ma tauva, pe toalua pe toatolu. Ou te alu lava tau uma lava lou vaega o le Tulafono ou te iloa ou te agavaa ai ou te alu. Ou te faasaga foi i luma o le Komesina o le Faiga Palota ma ou faapea atu i ai. O lau monotaga lea mai le pulenuu po o le sui o le nuu. O lau monotaga faale-lotu lea. O lou pepa fanau lea, o lou pepa matai lea, ma mea uma ia. E faapena foi la le sui lea ua agai mai, aepeitai e tapunia o e e fia o i le palota ma tauva e sue le Nofoa o le itumalo, ae lagatila loa le faamasinoga lea o le a fai. Ona fai lea o le faamasinoga, manao le isi sui e faapau au. E tautino lava le solo a le tamaloa, o le sui lea ua avea au ua matuai sosofa lava le aligaliga o le momoli o fuaiupu ma faafuaiupu o laina ma vailaina, o le Tulafono o Faiga Palota. E tainane lava ua maea ona saina le aao o le Komesina o Faiga Palota, e agavaa oe, agavaa au. Ae ua manao lava le sui se i sosofa le aligaliga o le tulafono, seia oo lava i le vai o le tama, ma alu se i sue le penina la e taoto i le moana.

Ia ona fai lea o le ma faamasinoga, fai lea o le faamasinoga ou pau po o le a lava ni vailaina ua afaina ai au. Ae taamilo loa le sui lea, ua taamilomilo le sui lea, alu loa le sui lea, toetoe lava toe tasi le aso faui loa i tua.

Fai mai le Tulafono, seiloga lava ua aumai se pepa mai mai le fomai e agavaa ai lou le toe alu, ae tatau lava ona e alu i le faiga palota. O lau la tilotilo i le Tulafono, aisea na e le fai ai i le Komesina o Faiga Palota I le taimi na e alu atu ai, oe lea na faasaga mai ia te au. O au e i ai lou gasegase tumau. Ae a fai foi ua maea le ma faamasinoga, ua ou malolo,

ua ou faatamalii lau nofo. O le a le vave e toe maua ai le tagata lea i se gasegase tumau? O le tactics lea a le tagata lea. O lea ou te fai atu o le tagata lea ua alu e fai le mea lea, e matua obvious lava le mea lea. O le mea tonu lava lea e taua i le aganuu, o le lafi i le fatifataloto le mea lea.

E faafetai i lau Afioga i le Minisita i le Tulafono lenei, e atagia tagatafili pioga ma saoga o le Tulafono lenei. Ae i ai uiga atilililo o le Tulafono lenei. Ou te matua ou faafetai i le vaega lea o le Tulafono, e pei e foliga mai le tagata lea ua na faia le mea lea, e pei ua na breach ina le legal process o le Tulafono o Faiga Palota.

E faafetai i lau afioga i le Minisita mo le Tulafono, e matuai talia lele e le usugafono a le itumalo lenei le tulaga lea.

Ona ou oo mai lea lau afioga i le Fofoga Fetalai i pre-polling, faafetai ua tasi le aso. A ou manatu i le pre-polling, o lea ua uma ona fai i ai finagalo o le Maota lenei. Pe 1, 2 e autovaa mai i le falepalota, malolo atu ai lava lea, se i tapuni i le ta o le 4:00. Ae faafetai i le faatofalaiga a lau afioga i le Minisita, manaia le aso lea e tasi.

E faamuliai se tautalaga i falepalota faapitoa nei. E ave lau faafetai i le tulaga lea, ma ou te taliaina le tulaga lea. E faafagogotagiao lava le faaupuga lea ou te faalogo so o i ai. O le mea e lelei i Savaii e lelei foi i Upolu. Ae ou te tau atu, e tuula latou le pese lea. O le mea e lelei i Savaii, Puleono, e lelei Upolu, ae ia sili foi ona lelei mo Manono ma Apolima. A fai faiga palota i falepalota taitasi ia, taua leaga e le toe faia sau palota, ae o Savaii i le femalagaai atu a e o lo o ua au le soifua i le 65. E feoi fua i vaa. Na ona faali lava o le ID, feoi i vaa. A o lou motu e leai ni vaa o le Malo, o vaa o nai tagata latou. So o expense a ia a nai tagata matutua o lou itumalo i le tulaga lea. Ae afai tulaga ia, ou te faafetai tele i tulaga ia o palota faapitoa i fale palota. Se i tuutiitia ai le feoi o le tatou atunuu, aemaise o le tulaga lea ua taua. O au le isi tagata e pagatia tele, leaga e o ou motu e 2 i vaa.

O le aoatetele lena lau afioga i le Fofoga Fetalai, ma le saafilimamate, ia aoga lenei Tulafono mo le tatou agai i luma. Aua ne i o tatou taamilomilo, aua tatou te iloa lava le taamilo a le tagata foi lele, e pei o la e ivea e lafi i lalo o le paaute i tulaga faapea.

Avatu ai le faamalo i lau afioga i le Minisita e tusa ai ma le Tulafono. Faamalo foi i lau afioga i le Fofoga Fetalai, faamalo foi i lau Afioga i le Palemia, le sui Palemia ma le mamalu o le Kapeneta, ma le la foi Ituvai lau Afioga i le Taitai o le Itu Agai, ma le sui Taitai ma le mamalu. Ia manuia le tatou Fono i lenei afiafi, manuia lou itumalo o faafogafoga mai, manuia Samoa ma Ofisa Sili o Pulega o Matagaluega, manuia le Fonousu a Samoa. Faafetai.

**FOFOGA FETALAI:** Malo saunoa i le sui mamalu o le Aiga i le Tai, lau afioga i le sui Fofoga Fetala, mo lou sao i le Tulafono.

Ou te manatu ona o lea ua lalata lo tatou taimi malolo, o lea ou te faamalie atu ai i le sui usufono mo Gagaifomauga Nu 1, se i maea mai le tatou malologa ona lafo atu lea o le avanoa i lau afioga i le sui mamalu.

Ou te faasilasila atu, ua faataatiaese nei Taulumaga o le Fono Aoao Faitulafono mo lana malologa.

*Na faataatiaese Galuega a le Fono Aoao mo lana malologa i le itula 7:40 i le afiafi, ma toe faaauau i le itula e 8:20 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Faiga Palota (Nu 2) 2021.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoao Faitulafono. Ou te talitonu, o lea ua matuifau le tautega ma le taligasua i le paia o le Palemene. E i ai foi le manatu ua maua se faasiligamalosi e faaauau ai le tatou galuega. Malo faafetai.

E faataatiaese Taulumaga ma Galuega o le Fono Aoao Faitulafono o le tatou malologa, ua maea ona saunoa le sui usufono mo le Aiga i le Tai. Ae ua maea foi ona faailoa atu e le Nofoa le avanoa o le a sosoo ai mo le saunoaga a le sui usufono mamalu mai Gagaifomauga Nu 1.

Tapa lau afioga i le sui mamalu e tulai mai mo lau saunoaga mo le Tulafono Tau Faaofi.

**Tofa Hon FAIMALOTOA KIKA STOWERS-AH KAU:** E faafetai i lau Afioga i le Fofoga Fetalai, mo le avanoa o le usugafono a le sui usufono mo Gagaifomauga Nu 1. E faafetai foi i lau afioga ma le afaigaluega mo le faamalositino, e maua ai se faasiligamalosi o sui mamalu o le maota aua le faaauauina o le tatou galuega i lenei afiafi.

E faatalofa atu i lena itu o le Maota, lau afioga i le Palemia ma le Kapeneta, e faapena foi i Minisita Lagolago. Faapena foi i lenei itu, le Taitai, le Sui Taitai ma sui mamalu o lenei itu. E faamalo atu i le afaigaluega a lo tatou Malo ma Faalapotopotoga o lo o tapuai mai pea, aua le alofaiva o le tatou Maota nei, i le faagasologa o le tatou galuega.

Lau Afioga a le Fofoga Fetalai, e momoli atu le agaga faafetai i le Afioga i le Minisita mo le toe faataatiaina mai o se toe iloiloa o lenei Tulafono taua o le faiga palota. Aua e talitonu, e le o se mea fou, e toetiiti lava Paeaiga uma e toe Iloilo ma saga Iloilo a o loma se faiga palota tele a lo tatou atunuu. O se tulaga foi tatou te iloa ai ia ni mea, e ao ona tatou toe poupu ma ni mea e tagatagai totoa i ai mo le faaleleia mo le tatou agai i luma i lenei mataupu taua, mo le filifilia o sui usufono o le Maota nei o le Palemene.

Lau Afioga i le Fofoga Fetalai, e le toe tele se faamatalaga a lou nei sui usufono. E le toe tele se tala e fai aua o lea ua kava uma mea uma sa ta fia lauga ai, i sausaunoaga a le tele o sui mamalu ua maea ona sausaunoa. E tai pei foi la o le monotaga, it's either or, tilotilo i ai, e tatau ona o faatasi mea e lua. Aua e sao ai le upu foi lea, o lou manatu e

le o le outou finagalo lea, o lo outou finagalo foi, e le o sou manatu lea. E tofu lava le tagata ma lona finagalo ma lona taofi. O se lagona lena ma ou te le toe fia foi foi i ai. E pei foi o le toe faatulai mai o special booths, e matua talia atoatoa e lou nei sui usufono. E leaga e tele faigata ma faafitauli na feagai ma i matou mai Savaii. O mea faapena ua maea ona folasia malamalama.

Ae mo le faasaoina o le tatou taimi lau afioga i le Fofoga Fetalai, faataga mai ta ita. E iai lava au tamai fesili, a ou malamalama ai, ou te iloa a ta malamalama lava i se mea, ta te le toe tu soo i luga.

O le tatou mataupu lea e talanoa nei ma le toe teuteuga ma le toe iloiloina o le Tulafono o Faiga Palota. O lau fesili, a faapea o le a tatou pasia nei ia teuteuga nei ua tatou soalaupule ai ma tatou faasoa ai, o lona uiga o lea o le a faaoga le tatou teuteuga lena i palota laiti ia e 7, a itumalo e 7 ia na toe iloilo mai i totonu o le faamasinoga? O le muamua lena o sou fia malamalama.

O le lona lua o au fesili faamolemole ma le agaga faaaloalo. O le a le amiotonu... e amiotonu lea mea pe a faapea o le a apply ia le tatou toe teuteuga nei i palota nei a itumalo e 7, a o lea sa laugatasia i tatou uma itumalo uma o le atunuu, i le Tulafono o Faiga Palota e pei ona tatou i ai i le Palota tele a le atunuu? Afai e ioe, ona i ai lea o si ou manatu, e na o au lava, pe i e iai se mea e musumususu mai ai. A fai e le amiotonu la lea mea, o se fautuaga, e a pe a tuufaatasi vaega o le a tatou iloiloina, ua tatou iloa ua talafeagai ma fetau, ona tatou faatali lea, aua o lea ou te maitauina e au, e i ai le komisi latou te sailiili ma suesue tulaga na tutupu i le faiga palota. Ona faatali lea o se lipoti lea. ma tuufaatasi ma le tatou galuega, lea ua fai i le aso, ina ia faapena ona tatou agai ai mo le lumanai i le agai i luma. Faamolemole faamagalo mai ita.

Ou te auai i le mea lea. O lea ua ova i le 70 ou tausaga, faatoa ou vaai lea i se palota ua aupito sili ona palapala ma eleelea, talu ona ou palota, talu ona tutoatasi le atunuu. Faamolemole, o le lagona lea e avatu, pei la o lau fautuaga lea. A fai o lea o le a apply, e amiotonu ona o lea e 7 itumalo, o se vaega toaititi? E pau lena o lau fesili, e pei ona ou fai atu, ua cover uma isi mea ia sa ou fia lauga ai, ae mo le faasaoina o le taimi.

Lau Afioaga i le Fofoga Fetalai, a i ai se sese o le fesili, toe faafoi mai ia Faimalo, ia ae pau lena o si mea o lo o ou fia malamalama ai. Ma le agaga faaaloalo.

**FOFOGA FETALAI:** E faafetai i le sui usufono mamalu. O lea ua maua le finagalo. E pau lava le popoe o le Nofoa, o se faaupuga lea faapea “*o se faiga palota palapala ma le eleelea*”. Ou te manatu lau afioga i le sui usufono mamalu, o tatou uma lava o lo o taumafai i se mea lelei. E taumafai foi le Malo i se tulaga ina ia lelei ma amiotonu, ae pei ua mamafa tele foi lea faaupuga. Ae pe mafai ona tulai mai e toe faaui i tua au faaupuga ia ua mamafa tele, lau afioga i le sui mamalu.

**Tofa Hon FAIMALOTOA KIKA STOWERS-AH KAU:** Lau Afioaga i le Fofoga Fetalai, o le sui nei e pei lava ona ou talanoa atu, ou

te le faatautee i se faatonuga a le Nofoa. Na ou faapea au e muamua, o lea foi sa saunoa isi sui usufono, e pei e mamafa atu ma le siisii o le leo. Ae o lea foi, o lau lauga faapitoa, ae faatu le lafo, o ta nofo filemu i lalo e le i faaalua manatu o lou itumalo, aemaise foi o au o le sui o tina ma tamaitai o Samoa. Ua na o au le sui lea e tulai atu i inei e faaleoina o latou finagalo.

O lea la ua ua ou toe manatua ai, le faaleoina... e uma atu le matou leitiofoni i le po. O le toatele o tina fai mai. Na matou faalogologo atu i le Tala o le Tupe, o le a le mea na e le tu ai i luga. O se latou fautuaga na aumai, o la e faafofoga mai tina ma tamaitai o Samoa. E manaia le ulutala, e poupou atiae, fai mai Faimalo a e le tu i luga e fai le mea lea, a outou le poupoua muamua le faakerisiano ma le mamalu o le Atua o lo o faavae ai Samoa. Tou te fiu e poupou, fiu e atiae e maumau lo outou taimi pe a leai le Atua ma outou.

E le gata i lea, ia faapena ona outou atiae ma toe poupou le tatou aganuu, lea sa malu ai ma mamalu ai mea uma. E pei o le tulaga lena lau afioga aua e te toatamai. O au ia e talia so o se mea, a o lea ua ou faalogologo atu, o au a lea, a fai atu loa sau tala fai mai loa...ae o la ta... e leai, ou te talitonu lava o lea ua faaali lo ta lagona. O lena ua ou faamalulu atu i le Maota. O la e faafofoga mai Samoa. E leaga lou nofo na o oe ma tiga ai fua lou loto, ma alu ai fua lou mafaufau. Ae a avatu lava i fafo, avatu i le leo malu ma le talosaga vaivai.

Lau afioga i le Fofoga Fetalai, faafetai tele.

**FOFOGA FETALAI:** Ia malo. Atonu e taua foi, e ese foi lou finagalo ese le upu ua sau. E pau lava le mea o upu ia ina ia aveese ma faamaumauga a le Palemene. A o lea ua maua lou finagalo, o le poupou ma le faaleleia itu faakerisiano ma le aganuu. O lea ua manaia i le faalogologo a le Maota. I le faafofoga foi a lo tatou Maota, malo faafetai, malo foi le saunoa.

O lea itu o le Maota, o le sui usufono mamalu mai le Vaa o Fonoti.

E talitonu lava o lea ua tapena mai mo se fesoasoani mo le tatou Tulafono.

**Tofa MAUU SIAOSI PUEPUEMAI (Vaa o Fonoti):** Lau Afioga i le Fofoga Fetalai, e manatu o lea ua taegaumalama. O lea foi ua sao mai i alo le sa o le toa o le ava ma le auma fatimua o le vasa, e ala i lo outou soifua momoli mai, a o so matou ola maua pea. E faaauau ai nisi o gauega o totoe i lenei po aua le usuia o le Fono a le Palemene o Samoa.

E talitonu foi o lea ua talifeauga foi le taimi o le vaa e tasi o Samoa. E tauluga ai foi faamoemoe o lenei po. Lau Afioga i le Fofoga Fetalai, ou te tulai atu ma le agaga faaaloalo, e fai se sao o lenei itumalo o le Vaa o Fonoti, aua foi le teuteuga o le Tulafono e pei ona taoto i lumamea nei.

E fia faamauina le faamalo a lenei itumalo, i lau afioga i le Minisita, faapea foi le Komesina ma le Ofisa o le Faiga Palota, ona o nisi o

teuteuga. O lea foi ua maea ona sausaunoa ai nisi e toatele o sui mamalu.

Ae o le a agai loa se vaivaiga o lenei itumalo, i si vaega laititi lea o le Tulafono. O le vaega lea o monotaga faaleaganuu, ma le monotaga faale-lotu. E lagolagoina e lenei sui usufono le monotaga faale-nuu ma le monotaga faale-lotu. E i ai foi lou taofi, a faaipoipo vaega ia e lua, e sapaapaia e lenei itumalo. E afua mai lea i totonu lava, o le afioaga e tasi. O le a ou le talatala le vaega lea o monotaga faale-nuu faapea foi monotaga faale-lotu. E talitonu o lea ua lausilafia uma e sui mamalu, aemaise foi o le fita faafogafoga mai a Samoa. O le pitolaau a monotaga faale-nuu e faapea foi i monotaga faale-lotu. Ae afai e faaipoipo lelei mai totonu o le afioaga e tasi, ou te talitonu e auai lenei sui usufono.

E talu ai o lea ua matauina e lou sui usufono, o lea e foliga mai o lo o i ai si vala laititi lea o le monotaga faale-lotu. E agavaa ai se sui tauva mo se faiga palota.

O le a ou avatua se faataitaiga mo lou tagata. O au ou te nofo i Vailoa Faleata. A fai ou te le saofia i Fagaloa, ona ou lotu lea i Vailoa uta, ma o i ina foi o lo o fai ai

lau matafale. Ona faapena lava lea ona faaaigalua, o Fagaloa ma Vailoa. A fai la o lea ua faataatia mai se ata faataitai, e faapea e ono mafai ona ou tauva i le itumalo lea, i le afioaga lea o Vailoa. E leai sou suafa matai i le afioaga. A o lea o le a agavaa ia au, ou te tauva i le faiga palota, ona o lau tautua i lau monotaga faale-lotu lea e i i. O lea e alalatai mai le afioga i le Minisita, le fetalaiga ia Leatinuu, e tausi mamalu foi aua le afio o Siliga ma muai Siliga. Eetai foi Nuu ma Leatinuu ma Ulualofaiga.

A fai la o lea o le a ou agavaa ou te alu i le faiga palota i Vailoa ona o lau monotaga lea. A o lea foi e sauni le tamalii po o le tuua o Vailoa, e alu foi i le faiga palota. E i ai lou talitonuga e i ai le feteenaiga tele e tulai mai. E i ai le feteenaiga, ona pei o au, o lea ua faaaoga le monotaga faale-lotu ou te agavaa ai i le palota. A o le monotaga faale-nuu, e pei lava ona ou taua. O lea e afio mai le afioga i le Minisita, le fetalaiga ia Leatinuu. O mamalu ia o le afioaga e ave i ai le latou faamua. E leaga foi o upu o le pese, na tofia e le Atua ia Samoa ina ia pulea e matai. Ma ua vaeluaina i ai le suafa. O le mea lea lau afioga i le Minisita, o nai o ta popolega ia le sui o le Vaa o Fonoti. E manumanu, aua e le mafai, e le mafai ona nofonofa ai le afioaga. Aua foi e le o au o se matai o le afioaga. E le o au o se matai o le afioaga. E pei ua faaaoga lou matai, ou te agavaa ai i le palota, ona o lau monotaga faale-lotu. O le faataitaiga muamua lea lau afioga i le Fofoga Fetalai. O le popolega la lea e popole ai lou sui usufono, ina ne i tutupu ai ni vevesi, a o lea ua tasi le faatofalaiga a le afioga o Vailoa. O le fetalaiga ia Leatinuu po o le afioga i le Minisita, lea o le toe tofia ma filifilia. Ua tasi i ai, e tauva mo le faiga palota, a o lea ua ou toe oso atu ma au. Tulou le Maota, e pei la o popolega ia, lea e sili ona ou popole i ai.

Lau afioga, o le vaega lona lua, a fai la ae, ua alu alu nei se faiga filifiliga, ae te i ua le manuia le fetalaiga ia Leatinuu ae ou manuia mai. Ona talo loa lea o le fono a le afioaga. O le a fono lo tatou nuu, ona agai loa lea i ai o le faipule, aua o lea ua ou iloa, o lea sa ou agavaa mai le afioaga o Vailoa ona o lau tautua i le lotu. Ae ou alu atu i le.. ou te oo atu i le Fonousu a le afioaga, ae fai mai ia le talaluma, lau afioga i le sui usufono, sue mai sou nofoaga i tua i o. E leai se pou a taua i luma i i.

O popolega lea lau Afioga i le Fofoga Fetalai. E le afaina nisi o itumalo o lea ua maea ona fetuunai ona o tulaga fetuunaiga sa i ai i le Faigamalo talu ai, e le afaina i sou manatu. Ae ou te talanoa lava au ia, o lea ua ou le toe alu i Fagaloa ou te tauva ai i le Faiga Palota i lou itumalo lea ou te matai ai, ae o lea o le a faaoga ia le afioaga o Vailoa, ia ona o... ia faamalulu atu...

**FOFOGA FETALAI:** Toeitiiti ona faasala lea o oe...

**Tofa MAUU SIAOSI PUEPUEMAI:** O la ua silafia e le fale pizza la ua maona le Maota o la ua vili mai pe o le a aumai ia se pizza. Ia o le a le afaina lea mo se taimi mulimuli.

E pei o le popolega ia lau Afioga i le Minisita, se i toe silasila ane lava i nai vala ia. O nai vala ia, e i ai lou talitonuga, e pei ona ou faapulapula atu, e i ai ia feteenaiga o le afioaga, ona o lea ua autasi. Ae o lea ua ou alu, ona o lou talitonuga, lololo le pizza. Manaia le pepperoni, lava lau tupe. E ono tosina mai ai ia le mamalu o le aupalota. E le natia o tatou uma e leai se isi e sao mai i nei mea.

Ae o lau Afioga i le Minisita, ia e pei o nai atugaluga na. Se i toe silasila ane lava...

**Afioga Hon Leatinuu Wayne Soialo (Minisita mo Pisinisi, Alamanuia ma Leipa):** Lau Afioga i le Fofoga Fetalai...

**FOFOGA FETALAI:** Fai mai sina au malologa le sui usufono mamalu... Ia saunoa mai ia le Minisita o Pisinisi, Alamanuia ma Leipa.

**Afioga Hon Leatinuu Wayne Soialo:** Ou te le i fia faalavelave lava i le saunoaga matagofie a le uso. Ia ae faafetai mo le avanoa ua e tu mai ai, ae e tatau lava ona faamalamalama atu ia le mataupu.

Se i uma tali atu ia le Afioga i le Minisita o ia e ana le Tulafono. Ia ae masalo ailoga e tupu lena mea. Ia o le mea muamua e fai lava si mamao o le mea o lo o e alaala ai ia ma le mea o lo o e nofo ai. Ia ma le mea lona lua, ia ailoga e mafai ona ta o i le palota i lou itumalo, ia ona e ta te uso. Ia e pei na ona ou faapena atu ae se i uma tali atu ia le Afioga i le Minisita, ae talitonu le agaga e le mafai ona tupu ia lena tulaga.

Ia ae mafai ona gagau lau aupolapola i o i Vailoa pe a faapea e te finagalo i ai, ia ae e le mafai lava ona e alu i le palota. Ma le faaaloalo lava faafetai.

**Tofa MAUU SIAOSI PUEPUEMAI:** Ia lau Afioga i le Fofoga Fetalai, ia o lea ua oo tonu lava ia le saunoaga a le Afioga i le Minisita i le vaega lea o le a ou oo atu i ai.

O le vaega lea lau Afioga i le Minisita, o lea ua saunoa ia le Afioga i le Minisita ia Leatinuu, a faapea e mafai ona gagau le aupolapola, ia a tuu i fea ia lena mea manaia. Leaga e tatau ona alu le matai po o le sui tauva e nofo i totonu o le saofaiga a le nuu. E tatau ona ia silafia, taulumaga ma gasologa o le afioaga ia le uta ma le tai, tai ma le uta pe a faapea e mafai ona fai le vaega lea o le gagau o le aupolapola.

Ae o le tulaga lea ua saunoa i ai Leatinuu e moni lelei, e le mafai ona ou alu ou te tauva i Faleata, ou te alu pea ou te tautua. Ua lava lou itumalo i Fagaloa ou te sau ai i le palota ia ae o nai faataitaiga, o nai faataitaiga ia se i toe silasila ane lau Afioga i le Fofoga Fetalai. Aua o le upu moni lava, e alu aso, sau aso. O le tagata ma lona aiga. O le tagata foi ma lona faasinomaga. O le fanua ma lona tapuafanua. O le nuu ma lona tapunuu.

Afai ae tulai ia se sui e pei ona ou taua ia le faataitaiga, upu moni lava e uma lava le olaga nei o faapea isi, aua tou te leotetele. Ia a tou leotetele lava sau lava le toa o Fagaloa vivini i eleele o Faleata. O popolega ia.

Lau Afioga i le Minisita, o manumanuga foi ia o lou nei sui usufono. Ioe, e le mafai ona le tupu. E talasua ai foi ma e faamanualia ai ia agaga ma finagalo, aua e le talia e tupu ma ee o se itumalo, le sau o se matai e nofo i lea tafa e fia o Samoa sau ma faatau lona fanua, aua o au ou te nofo i Tulaele i lou fanua. E ui lava ina \$1 miliona le fanua la ou te nofo ai, ae na faatau lava i le malosi o le sui usufono o le Vaa o Fonoti. O lea la ou te tautua ai lava, ae o le popolega na lau Afioga.

Ne i te i ua i ai nisi o tulaga faapena. Ia se i... aua e le mafai ona i ai ni sui o afioaga e faatulai mai mo le Faiga Palota. O lea ua ou avatua le faataitaiga, ae toe sau loa la ma le sui lea, ae tauala mai i lana monotaga, ia lau Afioga i le Minisita, o le tuualalo lena a lenei itumalo o le Vaa o Fonoti se i toe silasila ane.

Ia ma le matou fautuaga mulimuli, taatia ese ia lenei Tulafono, ia se i maea lelei ia tatou Palota Laiti. Aua e i ai ia lou talitonuga, ia o tafega lava ia mai i le au mai i le Palota lautele, ia o lea lava e le i tini. O lea lava e le i tini ia le faamoemoe, ia e pei ona alo i ai ia le Faiga Palota lautele.

Ia lau Afioga i le Fofoga Fetalai, e momoli atu foi ia le faamalo a lenei itumalo i lou faatautaiga o le Fonousu a Samoa, ia e i ai ia le talitonuga, o lo o toa pea le tai. Ia na o si mea laitiiti lea e valuvalusia ai aa o le fau i lou finagalo, ia o lea foi ua ou mautinoa, ia o oe lava le ki ma le tatala. E i ai nai ou uso ia ua le atoa e pei e toafitu, ia po o le a sou finagalo i ai ia, e amiamia, ia ave foi lea i ai nai a latou seleni, ia faauma ai foi sia mea, ia o le tatalo atu lea.

O le a foi se faafofoga a lau Afioga i le Fofoga Fetalai ma lenei Maota, ia i sa matou talanoa ua paoagalu ma tautuapapa, ia faamagalalo

mai le auauna o le taumafai lava, ia e momoli atu ia nai motugamanatu, ia aua ia tatou mataupu e pei ona folasia.

Ia manuia foi ia le tapuaiga a lou itumalo, ae ou ola i le alofa o le Atua, ma le agaga faaaloalo faafetai.

**FOFOGA FETALAI:** Malo le saunoa, malo le tanoa i lau Afioga i le sui usufono mamalu mai i le Vaa o Fonoti.

**Tofa Manuleleua Paletasala T Tovale (Faleata 1.):** Lau Afioga i le Fofoga Fetalai.... pe a maua se avanoa faafetai.

**FOFOGA FETALAI:** Faapea ua e malamalama i le Tulafono.

**Tofa MANULELEUA PALETASALA T TOVALE:** Ia e manatu o le sui usufono mulimuli lea o le mataupu lea. Ia e vave lava foi e le umi se taimi...

**FOFOGA FETALAI:** Ia saunoa maia lau Afioga i le sui usufono mamalu o Faleata Nu.1.

**Tofa MANULELEUA PALETASALA T TOVALE:** E manatu e le toe oo se faamatalaga i le Maota lea ua lava ia saunoaga ma fetalai e pei ona saunoa i ai ia sui usufono mamalu o le Maota i lenei afiafi.

Ia e lelei le avatu sao ia o se manatu o Faleata Nu.1. ia e tusa ai foi ma le mataupu o lenei afiafi. Ae o se lagona o le sui usufono, e ese le taua i le sui lenei o monotaga ia e lua. O monotaga faale-nuu ma monotaga faale-lotu, e taua tele aua e le mafai ona alu na o le monotaga faale-nuu ae motu ese ia le monotaga faale-lotu.

E faaluaina foi ia le finagalo o le sui usufono e pei ona saunoa, ia le tulaga lea. E lagolagoina lava e lou nei sui usufono le o lua uma o monotaga ia e lua i le Tulafono, ona e i ai le manatu o lou sui usufono e i ai lona feteenaiga pe a faapea e alu na o le tasi. Faataitaiga leaga na tupu foi i lou itumalo i le palota lea na uma atu nei, ona o le sui na fia alu e le saofai i le fonu a le nuu ma tulaga monotaga faale-nuu, ae na o le monotaga faale-lotu.

Ia na aumai lona finagalo ae teena e le nuu. O tulaga la ia e popole ai. E lelei mo itumalo i taua. Ae ua ala la ona laga se manatu o Faleata Nu.1. aemaise lava o matou itumalo ia e tu taulaga. E faigata tele, e tele o itumalo e na o le tailua, taitolu nuu. Ae o itumalo ia tu taulaga, pe na o le tasi lua nuu mavae. Ae o le tele o nuu o nuu e le mavae.

E le iloa e le sui pe o ai lea aiga e nofo i uta i Moamoa i uta i Sinamoga, seivagana ai ia itumalo i tua e i ai itumalo ia, e iloa lelei lava e le sui le isi aiga o le isi nuu. E pei o se lagona lena o le sui usufono.

Lua, a faapea nei o le sui lea i monotaga faale-lotu lea ua sau e alu i le Palota, e le mafai ona nofo nofo te i ua alu, alu i le palota. Leai e ui mai muamua i totonu o le nuu. E ui mai i totonu o le nuu faatoa avatu lea o le tala a le nuu, ona iloa ai lea o lona tulaga agavaa e alu ma le le alu. O

le tulaga lena na ou talanoa atu ai i le sui lea na ou talanoa atu ai muamua.

E pei o se lagona lena o lou nei tagata, ae o au ou te lagolagoina ia le o uma o monotaga ia e lua, o faatasi. Ia e pei lava ona ou fai atu o le manumanuga lena a lou itumalo tu taulaga, leaga e fai sina toatele o nuu e le mavae.

Ia lua o se manatu, i le tulaga lea o le aupalota, tagata palota. I le tulaga lea e pei ona taua e se tasi o sui usufono faapea e alu atu e lesitala ae faapea mai le lesitala, e 10 tausaga e malolo ai ona faatoa mafai lea ona e lesitala i le itumalo lea ma e palota ai. Ae ia te au ia ma lou lagona i le tulaga lea, e agavaa le tagata foi lea e tausavali mai i tua, nofo i Apia e faigaluega pe aoga, e toe foi lava i tua e palota i lona itumalo o la e i ai.

Ae o e o la e nofo i Apia nei i talafatai ia aua o lea ou te talanoa atu ona o lou itumalo, e tele le le manuia. Ia a faapea o au lea e sui usufono i le itumalo lea ae o lea ua ou finau i le Minisita, se e fia fai le auala lea, e fia fai le isi atinae lea o le matou itumalo, ae o lea e nofo tonu ai le tagata i le auala lea ua ou talosagaina i le Minisita e fai, o lea la e manuia ai. Ae e le o palota i le sui usufono lea e mafua ai ona fai ia le auala lea.

E pei e tasi lena ou lagona e manaia lava le palota o le tagata ia i le itumalo o lea ua nofo mau ai. E pei ona ou fai atu seivagana ai e o feoi, e na o aso faigaluega ma toe foi i tua po o fea le mea la e alaala ai, e agavaa i le tulaga lena o palota i le itumalo o lo o nofo ai.

Ia o le tulaga o le toe faai i tua o sui, ia e avatu ai foi se manatu i le tulaga lea i le sui e toe faai i tua ua uma ona faaulu. E lagolagoina lava e lou sui usufono ia le sui ua uma ona faaulu ae toe manao e toe faai i tua, e i ai lou manatu e le tatau ona toe faatagaina le toe faai i tua. Leaga o le sau i totonu e faataunuu le mo la e manao le isi sui e fai. A uma loa ua talia ua tau le mea na manao ai, ona toe faai lea i tua. Ou te le tau fai atu leaga na tupu i le palota lea na uma atu nei. O le tulaga tonu lava lena e teena tele e lou sui usufono i le tulaga lea o le toe faai i tua o se sui ua uma ona lesitala e alu i le Faiga Palota.

Ia e pei o nai manatu ia ua laga e le sui usufono o Faleata, e pei ona ou fai au e eseese ia itumalo, e eseese foi nuu e pei ona taua e nisi o sui usufono. Ia o vaivaiga na o lou sui usufono i lenei afiafi. Ae faafetai i lau Afioga i le Fofoga Fetalai mo le avanoa.

**FOFOGA FETALAI:** Faafetai o lea ua saunoa le sui usufono mulimuli... ia...

**Afioga Magele Sekati Fiaui (Faasaleleaga 2.):** Lau Afioga i le Fofoga Fetalai... o le itumalo lenei o Mataaevave. E le atoa se 2 minute.

**FOFOGA FETALAI:** Maua le 2 minute i le sui usufono mamalu mai i Faasaleleaga Nu.2.

**Afioga MAGELE SEKATI FIAUI:** Ia faafetai atu i lau Afioga i le Fofoga Fetalai mo le avanoa o lou itumalo. Faafetai i le Tama o i le Lagi mo Lana Puipuiga ma le tapuaaoina o le soifua ma le ola o sui usufono mamalu o le Palemene. Ia faafetai foi i si ou itumalo mo le tapuaiga. Ia alofa tele atu mo outou uma.

Ou te manatu o le a ou le toe paia le pa nai fualaga, ma sua le tuli aua le alii o aiga. O le a ou le toe oo i paia le vaea ma sa le avea o Samoa. Ia ou te talitonu ua taoto lava ae ua se alao. Ou te talitonu foi o lea ua atoa i Maota nei. Ae o le a faga tonu le malama ma vili tonu le ifi a Maina e molimoli atu nai motugaafa e fai foi ma sao o si ou itumalo, ia aua le sa folau o le Afioga i le Minisita e tauala i le Tulafono Tau Faaofi o Faigapalota ua opea i le Maota.

Lau Afioga i le Fofoga Fetalai o nai nisi vaega sa le maua i le taimi o le Pre-sitting, ia afai e aoga lelei, afai foi e le aoga mo le taimi nei ae mo le lumanai, ia manaia foi. O le vaega muamua lau Afioga o le tulaga faakerisiano ma le faale-aganuu. E i ai ia le talitonuga o lou sui usufono, ia o tulaga nei na fanau mai lava ma le tagata Samoa. This is our identity, this is who we are as Samoans. A o le faa-kerisiano ma le faale-aganuu. E talitonu foi i lalo o le Faavae o Samoa, ia e taumua tutusa lava ia le faa-kerisiano ma le faale-aganuu seivagana lava ia le faauigaina e le tagata soifua, ia ona eseese lea o le faauigaina. Ia e pule lava le tagata ia pe faasili ia le aganuu pe faasili laitiiti ia le faakerisiano.

Ae o se vaivaiga o lou sui usufono, ia e lelei foi le tuu i ai avanoa tutusa i o tatou tagata ua fia tauva, ia vaega ia o le latou soifuaga ina ia paleni tutusa. Ae tuu pea ia le faitalia i tagata lautele o le atunuu, ia mo le latou filifiliga. O le tulaga laualuga o lou sui usufono i lea tulaga, o le faamaoni, o le faatuatuaaina, ma le amanaiaaina o le sui faatu e tagata o nuu ma le itumalo.

O le vaega lona lua lau Afioga o se issue foi lea i le Faiga Palota talu ai e faaleoina atu pea ma le agaga faaaloalo, se i toe silasila ane lava i ai, i ni exceptions e ono mafai ona... mo le resitalaina o tagata palota i lea itumalo ma lea itumalo. O le faafitauli lau Afioga i le Fofoga Fetalai, e i ai si tina sa tauva lona alii i le Palota talu ai. E le i mafai ona liliu le palota a lenei tina ina ia lagolago ia le palota a lona alii, ona e ese ia le itumalo e nofo ai le tina lea, ese le itumalo sa tauva ai ia lona alii.

Ia o le agaga foi lea lau Afioga, o lea e matauina foi i folasaga, e tele ia itumalo o lea e i ai tagata e leai ia ni o latou piitaga i le sui tauva ma le itumalo ae o lea sa mafai ona resitala ma palota ai. A o le tagata pito sili lea o le limataumatau lea o le sui tauva, ae e le i mafai ona resitala foi lea i le palota i le itumalo sa tauva ai lona alii.

Ia o le isi vaega lau Afioga, o le Teuteuga o le Fuaiupu 8, (a) lau Afioga, o lo o i ai le upu e mafai or may, le upu Faa-Peretania, pe le alagataua ona sui i le upu foi lea o le tataua or shall ina ia faamalosi ia ia le Tulafono, ia ma aua ai ne i toe oo ia mea i le Faamasinoga.

Ia ma le vaega mulimuli, ia o le igoa puupuu foi lea ma le amataga, na e faapea e amata faamamaluina i le Aso e tuuina i ai le maliega a le Ao o le Malo. Ia na o se vaivaiga lau Afioga i le Fofoga Fetalai, ia pe le alagatau ona tuu foi i ai ia le Afioga a le i le Minisita ia lea malosiaga, ia mo tulaga le maalofia e ono le mafai ai e le Ao o le Malo ma Sui o le Fono a Sui Tofia ona faataunuina ia lea vaega. Ia e pei o le faatafa gasegase ma mea faapena.

Ia e matauina foi i le Tulafono o Fanua ma Suafa 2020, ia e amata faamamaluina i se aso e tofia ai e le Afioga i le Minisita, ua uma se manatu a le tama Faasalele. Manuia lau Afioga i le Fofoga Fetalai, le Palemia ma le Kapeneta, Taitai o le Itu Agai ma sui usufono mamalu uma o le Palemene, soifua.

**FOFOGA FETALAI:** Ia malo faafetai, mo le saunoaga a le sui usufono mamalu mai i Faasaleleaga Nu.2. Ia ou te talitonu o le taualuga foi lea o saunoaga a sui usufono mamalu mo felafolafoaiga ia aua foi ia le tatou Tulafono Tau Faaofi.

O le mea lea, ua maea saunoaga a sui usufono mamalu, o Tulafono Tau Faaofi, ia o le avanoa leni e tapa ai lau Afioga i le Minisita o Faiga Palota mo lau saunoaga e talifuaitau ai foi i mataupu sa laga e sui usufono mamalu.

Tulai mai lau Afioga i le Minisita.

**Afioga Hon FAUALO HARRY JEFFREY SCHUSTER:** Faafetai i lau Afioga i le Fofoga Fetalai mo le avanoa. E muamua lava ona fia momoli atu le faafetai tele lava i sui usufono uma lava na saunoa i le Tulafono Tau Faaofi o lo o taatia nei i luma o le Maota mo le iloiloia e sui usufono mamalu o le Fonousu a Samoa.

I le matau, e leai se manatu e vale, e leai foi se manatu e le aoga i le Tulafono lea o le Faiga Palota. O se tasi lea o Tulafono e pito sili ona taua i o tatou olaga, olaga faatemokarasi iinei i Samoa i le filifiliina lea o Taitai e taitaiina ia le Faigamalo. Ma e i ai foi ia lou talitonuga, o so o se Faigamalo po o se Paeaiga o se Palemene e iloiloia ia Tulafono nei, aemaise lava i Tulafono uma, e tatou te taumafai lava i mea e gata ai ia lo tatou malamalama ma le mafaufau i le Tulafono e talitonu e talafeagai ma amiotonu mo le faamoemoe lea e faamoemoe i ai.

E pei ona ou taua muamua, o le agaga o le Tulafono, o le toe faafoi lea o nai vaega, o agavaa sa agavaa ai ia sui tauva i le Faiga Palota tele lea na o tatou omai, a lea ua leai i le Tulafono e pei ona suia i le suiga lea na sui ai nei ia Mati. O suiga ia e tuu atu nei, o suiga ia e mafai ona fai. Ae ou te fia faatepa lau Afioga ma le Fofoga Fetalai ma le Maota, i le suiga lea ia Mati, o le tele ia o le suiga na fai i suiga na, e eseese ai ia le Palota lea na faaulu ai tatou ia Oketopa, ae o tatou palota i le Aso 9 o Aperila ma le Faiga Palota laitiiti lea o le a tatou agai i ai.

O lau... o le mau o le faamatalaga lea, manatua foi o le Paeaiga lea na uma atu nei, lea sa toe sui mai ai ia le Tulafono mai i itumalo faaleaganuu ae mei i itumalo faapalota. O le itu faaleaganuu la, sa i totonu

o le definition foi lea o le Faavae. O le faiga lea sa o tatou sau mai lava i le amataga. O le tofitofiga foi lea e tatou tuua o le Faiga Palota.

Ia lea la na oo mai i le Paeaiga lea na tea nei, sui mai loa e le vaega lea, sui loa i itumalo faapalota. Tou te matauina foi la i le faiga o le Tulafono lea, na toe vaevae itumalo. O le toe vaevaega la i itumalo na, sa i ai la le suiga lea ua le agavaa ia isi sui e o i vaega ia ua toe vaevae atu. O lea la sa fai e le Paeaiga lea na tea nei ia le faatagana lea, e mafai ona faaaoga mai lou monotaga, po o lau lesitala o lou igoa matai i le isi nuu lea sa e i ai i le isi itumalo lea e tasi ae faaaoga i le isi palota.

O le faataitaiga o au lau Afioga i le Fofoga Fetalai. O au na ou matai i lou Lefau i tai i Matautu. Fai lou Faualo i Apia. Ua vaevae nei ua aveese Matautu mai ia Apia, i le Tulafono lea na fai, ona fai mai lea o le Tulafono, e tau faapaleni ai le mea lea i toe vaevaega. E mafai, a faapea e i ai sou matai i totonu o le itumalo lea ua toe vaevae, e aumai la lau monotaga ma lau lesitala o lau palota lea sa i ai i le isi nuu o le itumalo lea e faaaoga i i. O lea la ua aumai lau... e le atoa lau monotaga i le 3 tausaga, e le atoa foi la le tulaga lea sa taua faapea e tatau ona 3 tausaga e resitala ai le suafa matai, lea na toe faamanino le Tulafono, e le i atoa i lou Faualo i Apia, e tasi e sioti e tasi le tausaga.

Ae lea la sa faataga e le Tulafono, e aumai lau monotaga i Matautu, ma lau lesitala o lau Lefau mai Matautu e faaaoga i Apia. A tou tagai la i le suiga lea, e matua tele lava le eseese o le Faiga Palota lea na o tatou o ai, ia ma le Faiga Palota nei, leaga o lea ua toe aveese atoa lava suiga, o le tauga o faiga palota lea e i i le Faavae, e le o toe itumalo faale-aganuu, ae o lea ua o tatou alu, i le itu faapalota. Ma e leai la se mea e mafai ona toe fai i mea na, o suiga ua uma ona fai. Ae o lea na fai i le Paeaiga lea na tea atu nei.

O lea e le i faia le Bi-election, ae o lea ua oti ia le qualification lea sa faaaoga i le taimi lea na o tatou palota ai. Ua le mafai la e sui e tai pei o au e i ai ma isi sui i itumalo ia na vaevae, ua le mafai ona o i le Palota laitiiti, e faaaoga ai la manaoga i le Palota lea ua uma atu. E ua eseese la le tulaga lea, i Tulafono na o tatou omai ma o tatou agavaa mai ai, ma le Tulafono lea ua taatia tonu lava i le taimi nei, ae e le i faia suiga i le Tulafono lea ua taatia i le taimi nei mo le Faiga Palota laitiiti.

Ou te fia faatepa la le Maota i le tulaga na. I le tulaga la lea e taumafai atu ai, i suiga ia e toe tau faatutusa ai lava i tulaga sa i ai ia Faiga Palota na i ai ia agavaa ma le Palota laitiiti lea e tatou te agai i ai. Sa faamanino mai e le Faamasinoga, o le tulaga i le monotaga e 3 tausaga ae sa i ai le tulaga i totonu o le Tulafono i faaupuga na i ai i le Tulafono, sa mafai ona toso mai le tulaga o lau monotaga sosoo, e 3 tausaga ma le aso e faaulu ai, ma le monotaga e i tua atu, e pau lava le mea ia 3 tausaga. O le mea lene sa i ai i totonu o le Tulafono i le vaiata o le Faamasinoga, ona toe fai mai foi lea o le Faamasinoga, e 3 tausaga e lesitala ai le suafa matai, e le o i totonu o le Tulafono, e leai la se manaoga o le Tulafono.

O le eseese la lene o lea e tau tulituli atu i le Tulafono, e i ai le sui na sau mai i le atu Aleipata i le taatiaga o le Tulafono lea ua toe sui ai

nei, e 3 tausaga e lesitala ai ia le suafa matai, e le mafai ona alu le sui i le palota lea na o tatou o ai, ona agavaa ai, ae ua le agavaa nei la i le Tulafono lea ua taatia i le taimi nei. E 3 tausaga e lesitala ai ia le suafa matai, ae sa agavaa i le Faiga Palota lea ua tea atu.

O le eseese lina o lea la e taumafai atu ia le Tulafono lea, ia taumafai pea, o e i le Tulafono lea e mafai ona sui, ia agavaa pea tagata la e pei o tatou, ia mafai ona o i le Faiga Palota lea. Ma e o le agaga lina o le Tulafono lea e Tau Faaofi atu, ia i ai lava se avanoa mo le Tulafono sa faataatia i le taimi na o tatou omai ai i totonu, ia toe faafoi i le itu lina, ae o tatou fai ai le Faiga Palota laitiiti.

E le o se suiga, e leai ma se agavaa o sui i le Faiga Palota lautele na o tatou o ai i le tausaga na tea nei, lesitala ia Oketopa ae fai ia Novema, ma le mea lea e faatu.. o le Tulafono lina na faaulu ai tatou, ae ua leai la le Tulafono lea, lea sa agavaa ai au, ua le agavaa ai foi isi tagata. O le suiga tele la le suiga lina.

Lau Afioga i le Fofoga Fetalai, i lau matau, i manatu na faaali e tai tutusa lava. Ae o le tele o manatu na faaali, o lea na folasia e le Taitai o le Itu Agai ia faapea foi ia le Sui Taitai. E na o le eseese lina e i ai, o le eseese e patino o le itumalo. Ou te lagona pe faafaigofie ai ma vave ia lo tatou afiafi, ae ou te faamatala atu faapena, o le fesili a Faimalo, pe moni, ma faamaoni ma tonu ia le faiga o le Faiga Palota...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai...

**FOFOGA FETALAI:** Fai sina malologa a lau Afioga i le Minisita, pe i ai se...

**Susuga Hon Tuilaepa Fatialofa Auelua Sailele Malielegaoi:** O se mea e fia faasao...

**FOFOGA FETALAI:** Ia se i saunoa mai...

**Susuga Hon Tuilaepa Fatialofa Auelua Sailele Malielegaoi:** O lea ua uma ona aumai ia le faamatalaga a le Afioga i le Minisita. Ma o lea e tau matau atu, o lea ua faamanuiaina i suiga ia sa fai o lea ua tulai mai ai i lona Faualo. A o le agaga tonu lea na avatu o le principle. O le faavae lea sa taumafai atu e avatu mo le agai i luma mo le agai i le lumanai. E o la ua matau ua i ai le finagalo o le Malo, e teuteu ia le Tulafono.

Ae o le principle lea na ou talanoa atu ai i le aotelega, i suiga ia sa fai e faatino ai le Faiga Palota lautele. Ma o suiga foi o suiga ina ua tuanai Faamasinoga faatatau i faiga palota lautele a le atunuu, o lea la mataupu sa laga, lea ua incorporate i totonu o suiga ia sa fai ma pasia e le Palemene atoa. Ia o le vaaiga la foi lea faalemafaua lea foi sa avatu i le Itu lenei, o le Tulafono lina o le Faiga Palota lea sa o tatou omai ai,

lea la ua aveese ai toafitu lea, o faipule o lena Itu. I Teuteuga fou ia, ua ese ia le tulaga lea ua o tatou i ai. O le principle lea ou te talanoa atu ai.

Afai lava o le Faiga Palota lautele lea e alu i le Tulafono ma suiga ia na fai, e faapena foi ona alu ai ia Faiga Palota Laiti ina ia tutusa le aiatatau ua aloaia a sui usufono fou ma sui tuai. Na pau lava lena o le mea lea na ou tulai atu ai, a o lea ua saunoa le sui usufono, o lea foi ua faafogafoga mai i saunoaga a lenei Itu ma lena foi Itu i vaega lelei o suiga ia, lea ua i ai nei. E pei la o le tulaga lena a matau mai, o le principle lea sa laga atu, ia taatia ia mo nisi faiga palota i le lumanai. A o lea ua manino i saunoaga le taua o suiga fou o le Tulafono, tele foi tatou tu ma a tatou agaifanua, ina ia o faatasi tatou tu ma agaifanua faataua faatasi ma le tautua a Ekalesia.

O le tulaga lena o lena e i ai itu lelei, o suiga ua faatu mai nei ae pau lava lena o le principle lea sa laga atu mo le agai i le lumanai – ia tasi le tulafono e faafoe ai Faiga Palota lautele ma faiga palota laiti.

**FOFOGA FETALAI:** Faafetai mo le fesoasoani mai i le... Faaauau le saunoaga a lau Afioga i le Minisita.

**Afioga Hon FAUALO HARRY JEFFREY SCHUSTER:** Faafetai i lau Afioga i le Taitai. Ia, atonu e le eseese o ta taofi i lea tulaga. O le fesili a Faimalo, pe moni ma faamaoni lea mea o le fai o le Tulafono lea a o loma le tatou faiga palota. Ia o le suiga foi na sui ai le Tulafono ia Mati, o le auala lava lea e tasi o lea e fai ai le suiga lea. O la e la e tutusa, e moni e i ai faiga faavae masani e tatau ona a talanoaina Tulafono faataatia Komiti ona aumai lea. E i ai foi le vaega o le suesuega a le Komisi. Ma e taua le tulaga lea i le suesuega a le Komisi. Ae pei o le taimi nei, na o se manaoga lena i le taimi nei ia taumafai... pei la o lau fai atu i le sui lea mai Aleipata, o le suiga lea o lea e mafai ona toe ofi mai ai ia i totonu, aua o lea sa mafai ona alu i le isi palota, a o le a le mafai ona alu i le palota lea, a o lea la o le a mafai ona alu i le palota lea. So, e tutusa la o tatou manatu i le tulaga lea. O le auala lava e tasi lea e sui ai le Tulafono. Ma o le agaga foi, a tagai i le suiga lea e avatu foi lea i le monotaga faalelotu, e sao foi le saunoaga a le Afioga i le Taitai ma le Afioga foi i le Sui Taitai i le tulaga lea e faamanino atili, o le tulaga e mafai ma e talafeagai foi. A o le faataatiaga lea e i ai, o le faalauteleina, ia ave le malosiaga i le Komesina o Faiga Palota e faagaoioi ai le faiga o le palota o le a loma nei.

**Tofa Hon Faimalotoa Kika Stowers-Ah Kau:** Lau Afioga i le Fofoga Fetalai...

**FOFOGA FETALAI:** Ia, pe i ai se mea o faaletonu i le saunoaga a le Minisita lau Afioga i le sui usufono mamalu mai Gagaifomauga Nu.1?

**Tofa Hon Faimalotoa Kika Stowers-Ah Kau:** O lota fia malamalama ona e le o ita o se Loia po o se Faamasino a. Faafetai mo le faamalamalamaga. Ae aisea le mea o le a apply ai loa i le taimi lenei ona o le palota, ona o se sui o lo o tau fia alu i le palota, a o lea sa tatou o lava i le... e ese le palota tele... tusa o le palota lea i lou lava vaivaiga, o le 7 lea na mafua mai ona o tulaga na faagasolo mai i le faiga palota tele. Ou te iloa foi o Tulafono ia na toe teuteu pei ona fefoifoiai, na fai ae le i faataunuuina le palota tele. Ae afai o le tulaga lea, e pei ona avatu sou vaivaiga, tatou o ai ia faapea. Ae leai se tulaga foi lele e faatautee, a o le fia malamalama pe aisea le mea o le a faapitoa ai se faiga mo ni sui usufono. Aua pei o lea o le a oso mai le manatu, why? O le a faapito ai i se tagata po o sina vaega toaititi, a o lea sa tatou palasi uma i le faiga palota tele i le Tulafono ua maea ona faataatia. Ma le agaga faaaloalo lau Afioga.

**FOFOGA FETALAI:** Faafetai mo le sui usufono mamalu mo le faauilavea. Ia ou te talitonu lava o lea ua saunoa foi le Taitai o le Itu Agai o principles na o lea tatou te vaavaa i ai mo le agai i le lumanai, ae o lea ua fofola le finagalo o le Minisita e ana le Tulafono, ia ou te iloa o le tulaga lena o lea ua tatou i ai mo le faagasologa o le tatou Tulafono ua i ai pei ona masani ai.

Ia, tulai mai lau Afioga i le Minisita e faaauau lau saunoaga.

**Afioga Hon FAUALO HARRY JEFFREY SCHUSTER:** Faafetai lava Faimalo. Ia pei ona saunoa le Fofoga Fetalai ma le Taitai foi, o le principle lava. A faapea o le principle sa mafai ona alu i le faiga palota lea ua uma nei ae toe sau nei le faiga palota lea ae fai atu sorry ua le qualify, ia pei la ua le ogatusa le principle ma le tulaga e tataua ona i ai le Tulafono.

Lau Afioga i le Fofoga Fetalai, i le tulaga lea i le monotaga faaleaganuu, monotaga faale-Ekalesia ma le malosiaga foi lea ua ave i le Komesina o Faiga Palota e faamaonia mai ai i le faamatalaga foi lea i le faatautaina le agavaa o se isi e alu mo le faiga palota. Lau Afioga o le manatu e avatu, a outou tagai i le suiga lea o le mea aupito sili ona taua ia i tatou, sa saunoa i ai le Afioga ia Alaiasa Sepulona i le tulaga foi lea mai le faamasinoga, na o lou itumalo e mafai ona aveesea oe mai le faamasinoga, na o lou itumalo foi e mafai ona aumaia oe i totonu o le Maota lea. Ae a tatou tilotilo la i le tagata lea e sau i le Maota lea, o le mea muamua mai lava i le amataga o le tatou atunuu e oo mai i le taimi lenei le faataua, o le matai. Seivagana la le taimi lea na i ai sui taitoatasi a o le matai, e te matai ona e sau lea i i. A tagai i le suiga lea e fai ai, o se suiga, e mafai e se matai o la e fia tauva ma agavaa e alu i le faiga palota ona oo mai i totonu o le fale lea e tauofoina ai tulaga foi ia o faafitauli, i manatu lava ia ma eseese faaletagata. A o auala uma ia a outou tagai i ai, e tasi lava le mea la e fai i ai, ia oo mai le matai lea e fia tausinio, ia oo mai totonu o le Maota lenei.

O le tulaga i le sui foi lea e toe fia faaui i tua, lau Afioga i le Fofoga Fetalai, o se vaega taua foi le Tulafono. O le tulaga foi lea, ia aua ne i taupulepule... e ono tupu, e taupulepule ni sui palota foi lea faapea, ta o, o le galuega a oe o le faapau o le isi sui lea, ae uma ona e toe sau lea i tua. E le o se mea fou. O le mea lea, o le tulaga lea... e oo foi i isi, o le tausinioga aupito sili ona taua lea i totonu o Samoa. O le tausinioga lea tatou te omai e sui o tatou itumalo, faaali manatu o tatou itumalo, o lou matai i le mea e te sau ai, e te sau i totonu o le Maota lenei. E i ai la le tulaga lea, e tatau ona puipui le mea lea, ia aua lava ne i tupu le mea lea o le taupulepule o ni sui faapea, ta o e fai le mea e faapau lea ae e sau aua o le tulaga foi e i ai le Tulafono i isi faalapotopotoga.

Lau Afioga i le Fofoga Fetalai, o manatu uma na faaalua, atonu o lau vaai o le eseese o tatou lava ia i le tulaga o le eseese o le aganuu ma le agaifanua i lea nuu ma lea nuu. Ae ou te lagona e le lava i sau upu ni faamalamalama o ni manatu taua o sui usufono uma. Ae o lo o loma le tatou komisi o le tele o manatu matagofie na e aumai, o lea e loma le tatou Komisi e ave i ai fesili uma ia ma mataupu sa laga.

E i ai se manatu manaia lava lea sa saunoa i ai le sui usufono mo Faleata 3, tatou te tilotilo i se ituaga komisi foi lea e le i ai nisi o tatou, tatou na o i le faiga palota lea e tu mai, ae aumai o i le komisi lea. Masalo ua oo i le taimi tatou te tilotilo foi lea aumai ni tagata tutoatasi na o le omai lava o latou e tilotilo i mea ia o agavaa, ae leai la se influence o tatou ia sa faipule e i ai i le faauluina mai o se Tulafono i le iloilo a tagata ia i se Tulafono, tagata tutoatasi. E le o se tuuaiga lau tala, ae i ai lava taimi o tatou manatu tatou te tilotilo foi lea i le Tulafono, ae i ai mea la e tatou te iloa i le Tulafono lea, e i ai lou manatu e faaali e sui le Tulafono i le mea lea e alu agai i ai lou manatu. E pei la e manaia i lau faalogo le tulaga lea, e le fai ai, a o se mea tatou te mafaufau uma i ai, pe le ua oo i le taimi o se komisi e vaai i Tulafono o Faiga Palota i agavaa ma mea uma faapena i faasalaga e pei ona saunoa i ai le Sui Taitai o le Itu Agai i le solitulafono lea pe a toe faaui i tua, pe le ua oo i le taimi e faatu ai se Komisi e aumai ni tagata tutoatasi e tilotilo. Ia ona fai mai loa lea e latou le Tulafono, ae le o se Tulafono foi lea o sui usufono sa i le itu i ina, o sui usufono sa i le itu nei, ua le o i le faiga palota ae ua omai toe fai le faiga palota. E matagofie manatu o lenei po ma lenei aso ona e fausia ai se... o fesili uma nei, e mafai ona tuu i se Komisi pe afai tatou te fuafua i se mea faapea.

**FOFOGA FETALAI:** Ia se i tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, na o se mea e fia faamalamalama. E taua tele le finagalo lea e faaalua. Ou te lagona ailogaga e i ai se isi i totonu o le Maota lenei e manao ina ia faataoto ni auala ina ia le amiotonu ai filifiliga o sui e omai. O le agaga foi lena o lenei komisi, e faataatia auala e mafai ai ona tonu ma sao faaiuga mo le filifiliga o sui. Ou te

lagona foi o le agaga lea o lea e agai uma i ai finagalo o sui usufono o le tatou Maota nei, ma ia tutoatasi foi sui auai i le Komisi Suesue

O le itu sa ou matauina e au, e lelei le vave fili o se komisi. O le itu taua i le vave fili o se Komisi ona o lea e fou, o lea e felesi faafitauli ia e feagai ma tatou. Ma a oo foi la i le taimi e valaau ai ni sui e fia fai ni molimau, e le taumate o i ina e mafai ona omai ai sui sa tamomoe ma pauu. Aua o sui na e aupito sili ona atamamai i a latou mea ia sa fai, e maua mai ai manatu eseese e teuteu ai tatou Tulafono, aua o faaiuga o komisi ma fautuaga e tele na aumai, le anoano o komisi sa faatu i aso ua tuanai, lea e fanau mai ai teuteuga o Tulafono. Ma o le isi la lea teuteuga sa teena pea e le Malo i aso ua tuanai, o le tagi mai lava lea a le tele o faipule ua pauu, i le tulaga lea o le le mafai ona iloa po o ai tonu ia e i le latou lola, ona e avatu le lola, oka oka, e matua le iloa, le iloa po o ai nei mau tagata. O i ina lea na fanau mai ai le manatu lea, se i faataitai ia ona aua ne i toe faia ni palota faapitoa special votes ae sili loa ona o i tua se i iloa e i latou e ana nuu nei nei mau mata e tele ua soona faafefete ai le latou lola palota.

O le ala lene lea na ala ai ona fanau mai le faiga lea, lea la ua tatou iloa uma lava e le lelei i le tulaga foi lea o le reality i le taugata ma le faigata. E tuu mai la le fautuaga lea, e tatau ona toe foi i le mea tuai, ua i inei foi se mafaufauga faapena. O lea foi la afai ua laga mai e lene itu ma faigofie foi ona tali atu i inei, e leaga o lea ua oooo ifo i loto mea na tatou vaai i ai. O le tulaga foi la lene o lea e taua ai le fautuaga lea a Faleata, e tatau ona tilotilo foi i le faamallosia o mea nei o le palota o le tagata i le mea e nofo ai. Aua a uma loa palota ae tulai mai ni faafitauli o le auala o le moli, o ai e alu i ai? O le tele o manatu faapea e aumai e komisi, manatu lelei, ae o le itu taua, o le televave foi lele ona fai se komisi ina ia mafai ai ona maua mai ituaiga suiga eseese e tatau ona fai ae o lea e le i tea atu le felesi o le manatua o mea sa fai. Aemaise e maua mai la le manatu lene mai ia i latou ia na pauu, aua e omai ua matua knowledgeable i nai a latou foi mea sa fai. E tupu uma lava ia i tatou uma, e le mafai ona tatou faapea na sao tatou ae sese latou.

Lau Afioga i le Fofoga Fetalai, se na tupu uma lava ia tatou. O le tulaga la lene, e taua ai le finagalo lea ua faaalua.

**FOFOGA FETALAI:** Faafetai o lea ua maua lou finagalo, faafetai foi lagolago i le saunoaga a le Minisita. Faafetai.

Ia faauma maia lau saunoaga lau Afioga i le Minisita.

Ia le sui usufono mamalu mai Anoamaa 1 pe i ai se... Ia, saunoa le sui usufono mamalu.

**Afioga Alaiasa Moefaauouo Malagaitutogiai Sepulona Moananu:** Lau Afioga i le Fofoga Fetalai, mo se avanoa lau Afioga leaga o lea foi sa saunoa le Afioga i le Minisita ma aumai ai foi se manatu o lenei itumalo. E pei o le uiga o le faamatalalaga mo le faamalamalamaina ona e le i maua lelei atu le uiga o le saunoaga a le Minisita. E pei ua faapea mai, ia o le Tulafono la lea, e faafaigofie ai ona maua le avanoa

o so o se tagata e sau ai i i le palota. E alu ai e fai ma sui tauva, po o le sao lea? Ae o le uiga o le mea lea e tau momoli atu, e tatau lava ona uia le ala o mea. E tatau lava ona mulimulitaia le tulaga foi lea e pei ona i ai le tatou auaunaga ma le tautua i o tatou nuu ma le itumalo. Ae aua le faapea e manao e faafaigofie, i se auala ina ia sau ai ae le uia le mea e tatau ona..e pei o le agaga lea lau afioga. O lea ou te tau maua, ou te lei maua lelei le saunoaga a le Minisita.

**FOFOGA FETALAI:** Ou te iloa o le agaga moni lava lena o le Tulafono. Tulai mai lau afioga i le Minisita e faamausali lea tulaga.

**Afioga Hon FAUALO HARRY JEFFREY SCHUSTER:** Lau afioga e le o se faafaigofieina ona sau se isi i totonu, a o le avanoa. Ia maua e le tagata o lea e fia tauva ia mafai ona oo mai i totonu o le Maota, ae le o aafia i tulaga o le eseese ma isi tagata. O le mea lea o lea e i ai le tulaga lea, o le monotaga faale-nuu ma le faale-lotu. O le agaga lea o le Tulafono, ia maua le avanoa e oo mai se matai. O le Tulafono foi lea e i ai e le faapea... e tatau ona e matai i le nuu lea e te sau ai, ma e lotu ai i ina i le nuu lea e te sau ai. E le mafai ona e lotu i se isi nuu, ae e fia sau i le itu...e tusa o la e te sau lava oe i le tou nuu. A o se auala pe a i ai se eseese o le va o oe ma la outou saofaiga.

Lau afioga i le Fofoga Fetalai, o nai manatu na mo le lagolagoina o le Tulafono ma tali atu foi i manatu matagofie o sui usufono na saunoa i lenei Tulafono.

Faafetai mo le avanoa.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota (2) 2021 i lona faitauga faalua.*

## **TULAFONO TAU FAAOFI O TEUTEUGA O LE TULAFONO O FAIGA PALOTA (Nu 2) 2021 – iloiloga auiliili**

**FOFOGA FETALAI:** E tusa ai ma Tulafono Tumau e amata le iloiloga auiliili i le Fuaiupu 2.

### **FUAIUPU 2: Ua teuteuina le fuaiupu 2.**

*Faamaonia.*

### **FUAIUPU 3: Ua teuteuina le fuaiupu 8.**

*Faamaonia*

**FUAIUPU 4: Ua teuteuina le fuaiupu 53.**

*Faamaonia*

**FUAIUPU 5: Ua teuteuina le fuaiupu 54.**

*Faamaonia.*

**FUAIUPU 6: Ua teuteuina le fuaiupu 58.**

*Faamaonia.*

**FUAIUPU 7: Ua teuteuina le fuaiupu 60.**

*Faamaonia.*

**FUAIUPU 8: Ua teuteuina le fuaiupu 61.**

*Faamaonia.*

**FUAIUPU 9: Ua teuteuina le fuaiupu 83.**

*Faamaonia.*

**FUAIUPU 1 MA LE IGOA**

**Fuaiupu 1: Igoa puupuu ma le amataga**

**IGOA: Teuteuga o le Tulafono o Faiga Palota (Nu 2) 2021.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Faiga Palota (Nu 2) 2021 e aunoa ma ni teuteuga.*

## **TULAFONO TAU FAAOFI O TEUTEUGA O LE TULAFONO O FAIGA PALOTA (Nu 2) 2021 – faitauga faatolu**

**Afioga Hon FAUALO HARRY JEFFREY SCHUSTER:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu 2) 2021 i lona faitauga faatolu.*

*Faaluaina e le Minisita mo Faatoaga ma Faigafaiva ma le Minisita mo le Soifua Maloloina.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

### **TOLOPOINA**

**FOFOGA FETALAI:** E talitonu o lea ua tatou taunuu mai i le faaiuga o le tatou galuega i lenei afiafi, e tusa o lafo na tatou faamaonia i le malama ua sola. Ae tatou te le i tolopo, o le a avea ia lenei avanoa.

E faaleo ai se faafetai a le Nofoa i le paia o le Palemene, e tusa ai ma le logosaia ma lo outou lavapapale i le taumafaiga o le tatou galuega.

E talitonu, e le i faigofie le asaina mai o le tatou galuega i lena vaiaso ma faaaau mai ai, i lenei vaiaso. Ua faaaaogagase foi lo outou mamalu, ona o le manatu i le tapuai mai o le atunuu na tofia ma filifilia i tatou. E oo foi i tuleiga ma saunoaga, e momoli atu ai le faafetai a le Nofoa. E faafetai foi i lo outou logosaia o se naunau atu a le Fofoga Fetalai, i le agaga ia mapo a tatou taulumaga.

O le mea lea lau Afioga i le Palemia ma le Kapeneta, faapea foi afioga i Minisita Lagolago, ae tainane lea itu o le Maota, i le afio o lau Afioga i le Taitai o le Itu Agai ma le mamalu o sui usufono o le Palemene, e momoli atu le faafetai a le Fofoga Fetalai.

E ui lava ia tatou faiga faavaega faaupufai, ae lagona lava le mitamita, e ese lava le Palemene a Samoa. Ona o le tofa faamatai o lo o soa ai le pule. O le faapogai foi lea o le mamalu o le Fono tumauaialuga lenei a le atunuu. Ua laulausasa outou faiva ina ua tatala le tofa ma le auafa mautalagata, faafetai le utauta mamao.

O upu lava e masani ai le atunuu, o lea ua toiu le aleiga a tautai matapalapala. Ua faamalo fai o le faiva e pei o le upu i ulumu.

O a foi nio tatou feeseeseaiga i manatu ma lagona, ia o tatou maua le finagalo fefaamagaloi. O le a foi se gagana a le Nofoa ua afaina ai lo tatou va, ia malie afenoa le Palemene. O le naunau lava ia tatou Tulafono Tumau, ae afai ua sipa ai se lamaga ia faatafea i nuu le aina.

Le tapuaiga a lau afioga i le Ao mamalu o le Malo ma lau Masiofo. Lau Afioga i le Sui o Fono o Sui Tofia ma lou faletua. Le Faamasino Sili ma le mamalu o le Faamasinoga. Faapea foi faauluuluga o ekalesia

kerisiano uma i le atunuu, ma le aufaigaluega tofofi a le Atua i so o se Fatafaitaulaga. O lea ua tautapuolo ma le papautusami le faatamasoaliiga a le Palemene, malo tapuai, faafetai tatalo.

Samoa ma lau tapuaiga i le tulaga aoatetele i le afua mai mauga tetele seia paia le fanau iti, ua faamalo tapuai faafetai tatalo. Manuia le alofaiga o lau Palemene, ona o le mana o la outou tapuaiga.

A fai foi ua i ai se upu a lau Palemene ua sala, i lau faafofoga tapuai mai, ia ui magalo mea uma i le toto o le Tamai Mamoe.

Manuia tele faigamalologa o lenei afaifi.

Ae tatou te le i tolopo, e talosaga atu i le afaiga i le sui mamalu mai Falelatai ma Samatau, e saunia faaii le tatou Fono i se tatalo.

***Na tolopo Taulumaga a le Fono Aoao Faitulafono i le itula e 9:35 i le po seia aulia le itula e 9:30 i le taeao o le Aso Lua, 14 Tesema 2021.***